

# আনন্দপাঠ (বাংলা দ্রুতপঠন)

ষষ্ঠ শ্রেণী



জাতীয় শিক্ষাক্রম ও পাঠ্যপুস্তক বোর্ড  
ঢাকা



জাতীয় শিক্ষাক্রম ও পাঠ্যপুস্তক বোর্ড কর্তৃক ২০০৭ শিক্ষাবছর থেকে  
ষষ্ঠ শ্রেণীর সহপাঠ্যরূপে নির্ধারিত

---

# আনন্দপাঠ

(বাংলা দ্রুতপঠন)

ষষ্ঠ শ্রেণী

## সংকলন ও সম্পাদনা

প্রফেসর ফাতেমা চৌধুরী

ড. সরকার আবদুল মান্নান

জিয়াউল হাসান

নুরুন নাহার

মোঃ মতিউর রহমান

---

জাতীয় শিক্ষাক্রম ও পাঠ্যপুস্তক বোর্ড, ঢাকা

# জাতীয় শিক্ষাক্রম ও পাঠ্যপুস্তক বোর্ড

৬৯-৭০, মতিঝিল বাণিজ্যিক এলাকা, ঢাকা-১০০০

কর্তৃক প্রকাশিত।

[ প্রকাশক কর্তৃক সর্বস্বত্ত্ব সংরক্ষিত ]

প্রথম মুদ্রণ : ডিসেম্বর, ২০০৬

সংশোধিত পরিমার্জিত সংস্করণ : নভেম্বর, ২০০৭

পরিমার্জিত সংস্করণ : নভেম্বর, ২০০৮

পুনর্মুদ্রণ :

কম্পিউটার কম্পোজ

ফাইন ডট লিঃ

প্রচ্ছদ

সেলিম আহমেদ

ছবি অঙ্কন

সরদার জয়নুল আবেদীন

ডিজাইন

জাতীয় শিক্ষাক্রম ও পাঠ্যপুস্তক বোর্ড

সরকার কর্তৃক বিনামূল্যে বিতরণের জন্য।

---

মুদ্রণ : A¼i AvBwmU tWtfj ctgU dvDfÜkb (l tqe web`vm)

## প্রসঙ্গ কথা

জাতীয় উন্নয়নে শিক্ষার ভূমিকা অতীব গুরুত্বপূর্ণ। আর এ উন্নয়ন একটি নিরবচ্ছিন্ন চলমান প্রক্রিয়া। স্বাধীনতা উত্তর বাংলাদেশের উন্নয়নের অব্যাহত ধারায় যাতে জনগণের আশা-আকাঙ্ক্ষা, আর্থ-সামাজিক ও সাংস্কৃতিক জীবনপ্রবাহ পাঠ্যপুস্তকে প্রতিফলিত হয়, সেই লক্ষ্যে গঠিত জাতীয় শিক্ষাক্রম ও পাঠ্যসূচি প্রণয়ন কমিটির সুপারিশক্রমে আশির দশকের প্রারম্ভে প্রবর্তিত হয় নিম্ন মাধ্যমিক ও মাধ্যমিক স্তরের শিক্ষার্থীদের জন্য নতুন পাঠ্যপুস্তক ও সহপাঠ্যপুস্তক।

দীর্ঘ সময় ধরে সহপাঠ্যপুস্তক প্রচলিত ছিল। কিন্তু আমরা জানি জাতীয় অগ্রগতির স্বার্থে শিক্ষা ব্যবস্থাকে গতিশীল, জীবনমুখী ও যুগোপযোগী করার জন্য শিক্ষাক্রম ও পাঠ্যসূচির ধারাবাহিক সংস্কার ও নবায়ন প্রয়োজন। এ প্রয়োজনের কথা বিবেচনায় রেখে ষষ্ঠ, সপ্তম ও অষ্টম শ্রেণীর বাংলা সহপাঠ্যপুস্তক ‘আনন্দপাঠ’ নামে সংস্কার ও নবায়ন করা হয়েছে। এ নবায়ন প্রক্রিয়ায় সর্বদাই কোমলমতি শিক্ষার্থীদের ভালো লাগা, আনন্দলাভ ও জ্ঞানার্জনকে গুরুত্বের সঙ্গে বিবেচনা করা হয়েছে। শুধু তাই নয়— আমাদের সমাজ-সংস্কৃতি এবং ইতিহাস ও ঐতিহ্যের সঙ্গেও নানাসূত্রে যেন তাদের পরিচয় ঘটে, সে দিকটিও বিবেচনা করা হয়েছে। অন্যদিকে অষ্টম শ্রেণীর শিক্ষার্থীদের উপযোগী করে বিশ্বসাহিত্য থেকে আটটি কাহিনী সংকলিত হয়েছে। প্রতিটি কাহিনী নির্বাচনের ক্ষেত্রে চিরায়ত জীবন, সত্য ও সৌন্দর্য তাত্পর্যপূর্ণভাবে প্রতিফলিত হয়েছে কি না সে দিকটে গুরুত্বের সঙ্গে বিবেচনা করা হয়েছে। প্রতিটি ক্ষেত্রে ভাষাগত সহজ সাবলীলতা ও গতিশীলতা রক্ষা করার চেষ্টা করা হয়েছে। এ গ্রন্থে এনসিটিবির পরিমার্জিত বানানরীতি অনুসরণ করা হয়েছে।

শিক্ষাক্রমের আলোকে মূল্যায়নকে আরো ফলপ্রসূ করার জন্য দেশের সুধীজন ও শিক্ষাবিদগণের পরামর্শের প্রেক্ষিতে সরকারি সিদ্ধান্ত অনুযায়ী প্রতিটি অধ্যায়শেষে বহুনির্বাচনি ও সৃজনশীল প্রশ্ন সংযোজন করা হয়েছে। প্রত্যাশা করা যায়, এতে শিক্ষার্থীর মুখস্থনির্ভরতা বহুলাংশে হ্রাস পাবে এবং শিক্ষার্থী তার অর্জিত জ্ঞান ও অনুধাবন বাস্তব জীবনে প্রয়োগ করতে বা যে কোনো বিষয়কে বিচার-বিশ্লেষণ অথবা মূল্যায়ন করতে পারবে।

আমরা জানি, শিক্ষাক্রম উন্নয়ন একটি ধারাবাহিক প্রক্রিয়া এবং এর ভিত্তিতে পাঠ্যপুস্তক রচিত হয়। কাজেই পাঠ্যপুস্তকের আরো উন্নয়নের জন্য যেকোনো গঠনমূলক ও যুক্তিসঙ্গত পরামর্শ গুরুত্বের সাথে বিবেচিত হবে। ২০২১ সালে স্বাধীনতার সুবর্ণ জয়ন্তীতে প্রত্যাশিত সমৃদ্ধ বাংলাদেশ গড়ে তোলার নিরন্তর প্রচেষ্টার সজ্জী হিসেবে শিক্ষার্থীদের সুষ্ঠু বিকাশে বর্তমান সংস্করণে মুক্তিযুদ্ধের প্রকৃত ইতিহাস ও চেতনা প্রতিস্থাপিত হয়েছে। অতি অল্প সময়ের মধ্যে পরিমার্জিত পাঠ্যপুস্তকগুলো প্রকাশ করতে গিয়ে কিছু ত্রুটি বিচ্যুতি থেকে যেতে পারে। পরবর্তী সংস্করণে পাঠ্যপুস্তকগুলো আরো সুন্দর, শোভন ও ত্রুটিমুক্ত করার চেষ্টা অব্যাহত থাকবে।

যাঁরা এই পাঠ্যপুস্তকটি রচনা, সম্পাদনা, যৌক্তিক মূল্যায়ন, সৃজনশীল প্রশ্ন প্রণয়ন ও প্রকাশনার কাজে আন্তরিকভাবে মেধা ও শ্রম দিয়েছেন, তাঁদের জানাই ধন্যবাদ। যাদের জন্য পাঠ্যপুস্তকটি প্রণীত হল, আশা করি তারা উপকৃত হবে।

প্রফেসর মোঃ মোস্তফা কামালউদ্দিন

চেয়ারম্যান

জাতীয় শিক্ষাক্রম ও পাঠ্যপুস্তক বোর্ড, ঢাকা

## সূচিপত্র

বিষয়	লেখক	পৃষ্ঠা
১. আয়না	জসীমউদ্দীন	১-৪
২. জাদুকর	হুমায়ূন আহমেদ	৫-১৩
৩. ঋণ পরিশোধ	মোহাম্মদ নাসির আলী	১৪-১৮
৪. রাখালের বুদ্ধি	ভিনদেশী রূপকথা	১৯-২১
৫. বালকের সততা	মোহাম্মদ লুৎফর রহমান	২২-২৫
৬. কাঠের পা	আনোয়ারা সৈয়দ হক	২৬-৩০
৭. চিন্তাশীল (নাটিকা)	রবীন্দ্রনাথ ঠাকুর	৩১-৩৫
৮. অবাক জলপান (নাটিকা)	সুকুমার রায়	৩৬-৪৩
৯. রসুলের দেশে (ভ্রমণকাহিনী)	ইবরাহীম খাঁ	৪৪-৪৮
১০. ওকিং মসজিদে ঈদের জামায়াত (ভ্রমণকাহিনী)	মুহম্মদ আবদুল হাই	৪৯-৫২

# আয়না

জসীমউদ্দীন



এক চাষি খেতে ধান কাটিতে-কাটিতে একখানা আয়না কুড়াইয়া পাইল। তখন এদেশে আয়নার চলন হয় নাই। কাহারও বাড়িতে একখানা আয়না কেহ দেখে নাই। এক কাবুলিওয়ালার ঝুলি হইতে কী করিয়া আয়নাখানা মাঠের মাঝে পড়িয়া গিয়াছিল। আয়নাখানা পাইয়া চাষি হাতে লইল। হঠাৎ তাহার উপরে নজর দিতেই দেখে, আয়নার ভিতর মানুষ! আহা-হা, এয়ে তাহার বাপজানের চেহারা!

বহুদিন তার বাপ মারা গিয়াছে। আজ বড় হইয়া চাষির নিজের চেহারাই তার বাপের মতো হইয়াছে। সব ছেলেই বড় হইয়া কতকটা বাপের মতো চেহারা পায়। তাই আয়নায় তাহার নিজের চেহারা দেখিয়াই চাষি ভাবিল, সে তাহার বাবাকে দেখিতেছে। তখন আয়নাখানাকে কপালে তুলিয়া সে সালাম করিল। মুখে লইয়া চুমো দিল। “আহা বাপজান!” তুমি আসমান হইতে নামিয়া আসিয়া আমার ধান খেতের মধ্যে লুকাইয়া আছ! বাজান-বাজান! ও বাজান!”

চাষি এ ভাবে কথা কয় আর আয়নার দিকে চায়। আয়নার ভিতরে তাহার বাপজান কতই ভঞ্জি করিয়া চায়।

চাষি বলে, “বাজান! তুমি তো মরিয়া গেলে। তোমার খেত ভরিয়া আমি সোনাদিঘা ধান বুনিয়াছি, শাইল ধান বুনিয়াছি। দেখ-দেখ বাজান! কেমন তারা রোদে ঝলমল করিতেছে। তোমার মরার পর বাড়িতে মাত্র একখানা ঘর ছিল। আমি তিনখানা ঘর তৈরি করিয়াছি। বাজান! আমার সোনার বাজান! আমার মানিক বাজান!”

সেদিন চাষি আর কোনো কাজই করিল না। আয়নাখানা হাতে লইয়া তার সবগুলি খেতে ঘুরিয়া বেড়াইল। সাঁঝ হইলে বাড়ি আসিয়া আয়নাখানাকে কোথায় রাখে। সে গরিব মানুষ। তাহার বাড়িতে তো কোনো বাক্স নাই! সে পানির কলসির ভিতর আয়নাখানাকে লুকাইয়া রাখিল।

পরদিন চাষি এ কাজ করে, ও কাজ করে, দৌড়াইয়া বাড়ি আসে। এখানে যায়, সেখানে যায়, আর দৌড়াইয়া বাড়ি আসে। পানির কলসির ভিতর হইতে সেই আয়নাখানা বাহির করিয়া নাড়িয়াচাড়িয়া দেখে, আর কত রকমের কথা বলে! “বাজান! আমার বাজান! তোমাকে একলা রাখিয়া আমি এ-কাজে যাই ও-কাজে যাই, তুমি রাগ করিও না। দেখ বাজান! যদি আমি ভালোমত কাজকাম না করি তবে আমরা খাইব কী?

চাষির বউ ভাবে, “দেখরে। এতদিন আমার সোয়ামি আমার সাথে কত কথা বলিত, কত-হাসি-তামাশা করিয়া এটা-ওটা চাহিত, কিন্তু আজ কয়দিন আমার সাথে একটাও কথা বলে না। পানির কলসি হইতে কী যেন বাহির করিয়া দেখে, আর আবোল-তাবোল বকে, ইহার কারণ কী?”

সেদিন চাষি খেত-খামারের কাজে মাঠে গিয়াছে। চাষির বউ গোপনে-গোপনে পানির কলসি হইতে সেই আয়নাখানা বাহির করিয়া তাহার দিকে চাহিয়া রাগে আগুন হইয়া উঠিল। আয়নার উপর তার নিজেরই ছায়া পড়িয়াছিল; কিন্তু সে তো কোনোদিন আয়নায় নিজের চেহারা দেখে নাই। সে মনে করিল, তার সোয়ামি আর একটি মেয়েকে বিবাহ করিয়া আনিয়া এই পানির কলসির ভিতর লুকাইয়া রাখিয়াছে। সেইজন্য আজ কয়দিন তার স্বামী তার সাথে কোনো কথা বলিতেছে না। যখনই অবসর পায় ওই মেয়েছেলের সাথে কথা বলে।

“আসুক আগে মিনসে বাড়ি। আজ দেখাইব এর মজা!” একটি ঝাঁটা হাতে লইয়া বউ রাগে ফুলিতে লাগিল; আর যে-যে কড়া কথা সোয়ামিকে শুনাইবে, মনে-মনে আওড়াইয়া তাহাতে শান দিতে লাগিল।

দুপুরবেলা মাঠের কাজে হয়রান হইয়া, রোদে ঘামিয়া, চাষি যখন ঘরে ফিরিল, চাষির বউ ঝাঁটা হাতে লইয়া তাড়িয়া আসিল; “ওরে গোলাম, তোর এই কাজ? একটা কাঁকে বিবাহ করিয়া আনিয়াছিস?” এই বলিয়া আয়নাখানা চাষির সামনে ছুড়িয়া মারিল।

“কর কী? ও যে আমার বাজান!” অতি আদরের সাথে সে আয়নাখানা কুড়াইয়া লইল।

“দেখাই আগে তোর বাজান!” এই বলিয়া ঝটকা দিয়া আয়নাখানা টানিয়া লইয়া বলিল, “দেখ তো মিনসে! এর ভিতর কোন মেয়েলোক বসিয়া আছে? এ তোর নতুন বউ কিনা?”

চাষি বলে, “তুমি কি পাগল হইলে? এ যে আমার বাজান!”

“ওরে গোলাম! ওরে নফর! তবু বলিস তোর বাজান! তোর বাজানের কি গলায় হাসলি, নাকে নখ আর কপালে টিপ আছে নাকি?” বউ আরও জোরে চিৎকার করিয়া উঠিল।

ও বাড়ির বড় বউ বেড়াইতে আসিয়াছিল। মাথায় আধ-ঘোমটা দিয়া বলিল, “কিলো, তোদের বাড়ি এত ঝগড়া কিসের? তোদের ত কত মিল। একদিনও কোনো কথা কাটাকাটি শুনি নাই।”

চাষির বউ আগাইয়া আসিয়া বলিল- “দেখ বুবুজান! আমাদের মিনসে আর একটি বউ বিবাহ করিয়া আনিয়া পানির কলসির ভিতর লুকাইয়া রাখিয়াছিল। ওই সতিনের মেয়ে সতিনকে আমি পা দিয়া পিষিয়া ফেলিব না? দেখ-দেখ, বুবুজান! এই আয়নার ভিতর কে?”

ও বাড়ির বড় বউ আসিয়া সেই আয়নার উপরে মুখ দিল! তখন দেখা গেল আয়নার ভিতরে দুইজনের মুখ। ও বাড়ির বড় বউ বলিল, “এ ত তোর চেহারা। আর একজন কার চেহারাও যেন দেখিতে পাইতেছি।”

চাষি বলিল, “কি বলেন বুবুজান, এর ভিতর আমার বাপজানের চেহারা।”

এই বলিয়া চাষি আসিয়া আয়নার উপরে মুখ দিল। তখন তিনজনের চেহারাই দেখা গেল? তাহাদের কলরব শুনিয়া ও বাড়ির ছোট বউ, সে বাড়ির মেজো বউ আসিল, আরফানের মা, রহমানের বোন, আনোয়ারার নানী আসিল। যে আয়নার উপরে মুখ দেয়, তাহারি চেহারা আয়নায় দেখা যায়—এ ত বড় তেলেছমাতির কথা!

শোন, শোন, এই কথা এ-গাঁয়ে সে-গাঁয়ে রটিয়া গেল। এ-দেশ হইতে ও দেশ হইতে লোক ছুটিয়া আসিল সেই জাদুর তেলেছমাতি দেখিতে। তারপর ধীরে-ধীরে লোকে বুঝিতে পারিল, সেটা আয়না।

### লেখক-পরিচিতি

জসীমউদ্দীন ১৯০৩ সালের ৩০শে অক্টোবর ফরিদপুর জেলার তাম্বুলখানা গ্রামে জন্মগ্রহণ করেন। গ্রামবাংলার প্রকৃতি ও সাধারণ মানুষের জীবন নিয়ে তিনি কবিতা লিখেছেন। তাঁর কবিতায় পল্লীজীবন বেশি উঠে এসেছে বলে তাঁকে বলা হয় পল্লীকবি। তিনি অনেক গদ্যও রচনা করেছেন। তিনি স্মৃতিকথা, ভ্রমণকাহিনী, নাটক ও প্রবন্ধ লিখেছেন। শিশুদের জন্য লেখা ‘ডালিমকুমার’ তাঁর অনবদ্য রচনা। এ ছাড়াও তিনি ছোটদের জন্য লিখেছেন ‘হাসু’, ‘এক পয়সার বাঁশী’ ইত্যাদি কবিতাগ্রন্থ। তিনি ১৯৭৬ সালের ১৪ই মার্চ ঢাকায় মৃত্যুবরণ করেন।

### সারসংক্ষেপ

এক চাষি একদিন ধান খেতে একটি আয়না পেল। তখনও এদেশে আয়নার চল হয়নি। এক কাবুলিওয়ালার ঝুড়ি হতে আয়নাটি পড়ে গিয়েছিল। চাষি হাতে নিয়ে আয়নার দিকে তাকাতেই নিজের ছবি দেখে মনে করল ইনি তার মৃত পিতা। সে আয়নাটি যত্নসহকারে পানির কলসির ভিতর লুকিয়ে রাখল। মাঠ থেকে প্রায়ই এসে সে আয়নাটি দেখত আর ছবির সাথে কথা বলত। এসব কাণ্ড দেখে তার স্ত্রী একদিন কলসির ভিতর কী আছে দেখতে গেল। সে আয়নায় নিজের চেহারা দেখে মনে করল, তার স্বামী আরেকটি বিয়ে করে এনে কলসির ভিতর বউকে লুকিয়ে রেখেছে। এ নিয়ে স্বামী-স্ত্রীর মধ্যে চরম ঝগড়া শুরু হয়। পাড়া-প্রতিবেশীরাও এগিয়ে আসে। সকলেই আয়নার দিকে তাকিয়ে বিভিন্ন চেহারা দেখতে পায়। নিজের চেহারা কেউই বুঝতে পারছে না। কিন্তু অপরের চেহারা বুঝতে পারছে। এদেশ-ওদেশ হতে লোক জাদুর তেলেছমাতি দেখতে ছুটে আসে। তারপর আস্তে আস্তে বুঝতে পারে, এটি আয়না।



### শব্দার্থ

আয়না - দর্পণ, আরশি। কাবুলিওয়াল - কাবুল বা আফগানিস্তানের লোক। ঝুলি- কাপড়ের তৈরি থলে। নজর - দৃষ্টি, লক্ষ। খেত - চাষের জমি। সাঁঝ - সন্ধ্যা। বাস্ত - তোরঙ্গ, পেটিকা। কলসি - ঘড়া, পানি রাখার পাত্রবিশেষ। সোয়ামি - স্বামী, পতি। ঝাঁটা - ঝাড়ু, যা দিয়ে ঝাঁট দেওয়া হয়। কলরব- কলরোল। চেহারা - মুখচ্ছবি। রটা - প্রচার, রাষ্ট্র হওয়া। তেলেহমাতি - জাদু সম্বন্ধীয়।

## অনুশীলনী

### বহুনির্বাচনি প্রশ্ন

- চাষি আয়নাটি কোথায় কুড়িয়ে পেয়েছিল ?  
 ক. ধানখেতে  
 খ. পাটখেতে  
 গ. গমখেতে  
 ঘ. মুলোখেতে
- ‘আসুক আগে মিনসে বাড়ি। আজ দেখাইব এর মজা’ - চাষি বউয়ের এরূপ ক্রোধান্বিত হবার কারণ-  
 i. অপরিচিত লোক ঘরে নিয়ে এসেছে  
 ii. রাস্তায় পড়ে থাকা জিনিস ঘরে নিয়ে এসেছে  
 iii. সংসারে গোপনে সতিন এনেছে

### নিচের কোনটি সঠিক ?

- ক. i  
 খ. i এবং ii  
 গ. iii  
 ঘ. ii
- কী করে লোকে বুঝতে পারল যে সেটি আয়না -  
 ক. বিশেষজ্ঞ এসে প্রমাণ করল  
 খ. একসঙ্গে অনেকের চেহারা দেখা গেল  
 গ. প্রতিবেশীরা এসে প্রমাণ করল  
 ঘ. আয়নার সঙ্গে পরিচিত লোক এসে বলল

### সৃজনশীল প্রশ্ন

#### ১. নিচের অংশটুকু পড় এবং প্রশ্নগুলোর উত্তর দাও :

চাষি বউ আগাইয়া আসিয়া বলিল- দেখ বুবুজান। আমাদের মিনসে আর একটি বউ বিবাহ করিয়া আনিয়া পানির কলসির ভিতরে লুকাইয়া রাখিয়াছিল। ওই সতিনের মেয়ে সতিনকে আমি পা দিয়া পিষিয়া ফেলিব না ? দেখ দেখ, বুবুজান। এই আয়নার ভিতর কে ?

- আমাদের মিনসে বলতে কাকে বোঝানো হয়েছে?
- সতিনের মেয়ে সতিন বলতে যা বোঝানো হয়েছে তার পরিচয় দাও।
- উদ্দীপকের মধ্যে চাষি বউয়ের চরিত্রের কী কী বৈশিষ্ট্যের প্রকাশ ঘটেছে লেখ।

# জাদুকর

হুমায়ূন আহমেদ



আজ হাফ-ইয়ারলি পরীক্ষার অঙ্ক খাতা দিয়েছে।

বাবলু পেয়েছে সাড়ে আট। শুধু তাই নয়, খাতার উপর লাল পেনসিল দিয়ে ধীরেন স্যার বড় বড় করে লিখে দিয়েছেন : ‘গরু’।

কী সর্বনাশ !

বাবলু খাতা উন্টে রাখল, যাতে ‘গরু’ লেখাটা কারো চোখে না পড়ে। কিন্তু ধীরেন স্যার মেঘ-স্বরে বললেন : এই বেঞ্চির উপর উঠে দাঁড়া।

বাবলু বেঞ্চির উপরে উঠে দাঁড়াল।

তোর অঙ্ক-খাতায় কী লিখে দিয়েছি সবাইকে দেখা।

সে মুখ কালো করে সবাইকে দেখাল খাতাটা। ফার্স্ট বেঞ্চে বসা কয়েকজন ভ্যাক ভ্যাক করে হেসে ফেলল। ধীরেন স্যার গর্জন করে উঠলেন : এঁয়াই কে হাসে? মুখ সেলাই করে দেব।

হাসি বন্ধ হয়ে গেল সঙ্গে সঙ্গে। ধীরেন স্যারকে সবাই যমের মতো ভয় করে। আড়ালে ডাকে ‘যম স্যার’। ফাস্ট বেঞ্চে একটু খিকখিক শব্দ হল। ধীরেন স্যার হুজ্জার দিয়ে উঠলেন :

আরেকবার হাসির শব্দ শুনলে চড় দিয়ে দাঁত খুলে ফেলব। নাট্যশালা নাকি? এঁয়া?

ক্লাস পুরোপুরি নিঃশব্দ হয়ে গেল। ধীরেন স্যার থমথমে গলায় বললেন : এঁয়াই বাবলু, তুই ঘণ্টা না-পড়া পর্যন্ত বেঞ্চির উপর দাঁড়িয়ে থাকবি।

বাবলু উদাস-চোখে জানালা দিয়ে বাইরে তাকিয়ে রইল। বেঞ্চির উপর এক ঘণ্টা দাঁড়িয়ে থাকা তেমন কিছু না। কিন্তু বাসায় ফিরে বাবাকে কী বলবে, এই ভয়েই বাবলুর গায়ে ক্ষণে-ক্ষণে কাঁটা দিয়ে উঠতে লাগল। বাবা মোটেই সহজ পাত্র নন। ধীরেন স্যারের মতো মাস্টারও তাঁর কাছে দুগ্ধপোষ্য শিশু। বাড়িতে আজ ভূমিকম্প হয়ে যাবে বলাই বাহুল্য। বাবলু এই ঠান্ডা আবহাওয়াতেও কুলকুল করে ঘামতে লাগল।

বাবলু ভেবে পেল না অঙ্কের মতো ভয়াবহ জিনিস কী করে পড়াশোনার মধ্যে ঢুকে গেল। কী হয় অঙ্ক শিখে? তৈলাক্ত বাঁশ বেয়ে উঠবার দরকারটা কী? আচ্ছা ঠিক আছে, উঠছে উঠে পড়ুক, কিন্তু প্রথম মিনিটে উঠে দ্বিতীয় মিনিটে আবার পিছলে পড়বার প্রয়োজনটি কী? বাবলু একটি দীর্ঘনিশ্বাস ফেলল।

স্কুল ছুটি হল পাঁচটায়। বাবলু বাড়ি না গিয়ে স্কুলের বারান্দায় মুখ কালো করে বসে রইল। স্কুলের দপ্তরি আনিস মিয়া বলল : বাড়িতে যাও ছোড ভাই।

বাবলু বলল, আমি আজকে এইখানেই থাকব।

কও কী ভাই। বিষয় কী?

বিষয় কিছু না। তুমি ভাগো।

আনিস মিয়া একগাল হেসে বলল, পরীক্ষায় ফেইল করছ কেমন? বাড়ি থাকিয়া নিতে না আসলে যাইতা না। ঠিক না?

আনিস মিয়া দাঁত বের করে হাসতে লাগল। বাবলু স্কুল থেকে ছুটে বাইরে চলে আসল। সরকার বাড়ির জামগাছের নিচে বসে রইল একা-একা।

জায়গাটা অসম্ভব নির্জন। কিছুক্ষণের মধ্যেই চারদিক ঘুটঘুটে অন্ধকার হয়ে গেল। বাবলুকে ভয় দেখানোর জন্যেই হয়তো অসংখ্য ঝাঁঝি একসঙ্গে ডাকতে লাগল। বিলের দিক থেকে শব্দ আসতে লাগল : ‘হতাহতা’। ডানপাশের ঝোপ কেমন নড়ে উঠল। বাবলু শার্টের লম্বা হাতায় ঘন ঘন ঘাম মুছতে লাগল।

এই ছেলে কাঁদছ কেন?

অন্ধকারে ঠিক পরিষ্কার কিছু দেখা যাচ্ছে না। বাবলুর মনে হল লম্বামতো একজন লোক ঝোপটার কাছে দাঁড়িয়ে আছে। লোকটির হাতে ভারী একটা ব্যাগ-জাতীয় কিছু। পিঠেও এরকম একটা বোঁচকা ফিতা দিয়ে বাঁধা।

এই খোকা কী হয়েছে?

বাবলু ফোঁপাতে ফোঁপাতে বলল, আমি অঙ্কে সাড়ে আট পেয়েছি।

তাই নাকি?

জি। আর ধীরেন স্যার খাতার উপর লিখেছেন : গরু।

বাবলু খাতাটা বের করে লোকটির দিকে এগিয়ে দিল। লোকটি এগিয়ে এসে খাতাটি নিল। সে বেশ লম্বা। এই অস্থকারেও প্রকাণ্ড বড় একটা চশমা পরা থাকায় প্রায় সমস্তটা মুখ ঢাকা পড়ে আছে। লোকটি গম্ভীর গলায় বলল, খাতার উপর ‘গরু’ লেখাটা অন্যায় হয়েছে। বুদ্ধিবৃত্তির উপর সরাসরি কটাক্ষ করা হয়েছে। তার উপর এত বড় বড় করে লেখার প্রয়োজনই-বা কী? ছোট করে লিখলেই হত।

বাবলু শব্দ করে কেঁদে উঠল।

উঁহুঁ কাঁদবে না। কাঁদার সময় নয়। কী করা যায় তাই নিয়ে আমাদের চিন্তা করতে হবে। ঠান্ডা মাথায় ভাবতে হবে।

বাবলু ধরা-গলায় বলল, আমি স্কুলেও যাব না। বাসায়ও ফিরে যাব না। বাকি জীবনটা জামগাছের নিচে বসে কাটাব। না, জাহাজের খালাসি হয়ে বিলাত যাব।

বুদ্ধিটা মন্দ না। কিন্তু চট করে কিছু-একটা করা ঠিক হবে না। ঠান্ডা মাথায় ভাবতে হবে। তোমার নাম তো জানা হল না।

আমার নাম বাবলু। ক্লাস সেভেনে পড়ি। আপনি কে?

ইয়ে আমার নাম হল গিয়ে হইয়েৎসুন।

কী বললেন?

আমার নামটা একটু অস্বুত, আমি বিদেশি কি-না।

কী করেন আপনি?

আমি একজন পর্যটক। আমি ঘুরে বেড়াই।

বাবলু কৌতূহলী হয়ে বলল, আপনার দেশ কোথায়?

আসো তোমাকে দেখাচ্ছি।

হইয়েৎসুন আকাশের দিকে আঙ্গুল দিয়ে দেখাল : ঐ যে দেখছ ছায়া, ওইটা হচ্ছে ছায়াপথ। মিল্কওয়ে গ্যালাক্সি। স্প্রিঙের মতো। এর মাঝামাঝি একটি সৌরমণ্ডল আছে। আমরা তাকে বলি ‘নয়ুততিনি’। তার ন’ নম্বর গ্রহটিতে আমি থাকতাম।

বাবলু একটু সরে বসল। পাগল নাকি লোকটা! কথা বলছে দিব্যি ভালোমানুষের মতো।

বুঝলে বাবলু, বলতে গেলে আমরা বেশ কাছাকাছি থাকি। পৃথিবীও কিন্তু মিল্কওয়ে গ্যালাক্সিতে পড়েছে। হা হা হা।

আপনারাও বুঝি বাংলায় কথা বলেন?

উঁহুঁ। তোমার সঙ্গে বাংলায় কথা বলছি কারণ আমার সঙ্গে একটি অনুবাদক যন্ত্র আছে।

সে ইশারা করে গোলাকৃতি একটি বাস্ক দেখাল। তার কাঁধের কাছে ঝুলছে। মশার আওয়াজের পিনপিন একটি শব্দ আসছে সেখান থেকে।

এই যন্ত্রের সাহায্যে যে-কোনো বুদ্ধিমান প্রাণীর ভাষা বুঝতে পারা যায় এবং সে-ভাষায় কথা বলা যায়। প্রাণীদের মস্তিষ্কের নিওরনে বিভিন্ন ধ্বনির যে-লাইব্রেরি আছে এবং শব্দবিন্যাসের যে-সমস্ত ধারা তা এই যন্ত্রটি ধরতে পারে।

বাবলুর একটু ভয়-ভয় করতে লাগল। লোকটি বলল, এই-যে চারদিকে ঝাঁঝি পোকা ডাকছে এরা কী বলছে তা তুমি বুঝতে পারবে যদি যন্ত্রটা তোমার কাঁধে ঝুলিয়ে দিই। দেব?

বাবলু ভয়ে-ভয়ে বলল, দিন। কিন্তু ব্যথা লাগবে না তো?

উঁহুঁ। মাথা খানিকটা ভাঁ ভাঁ করবে হয়তো। দিয়েই দেখ।

হইয়েৎসুন যন্ত্রটা বাবলুর কাঁধের উপর বসিয়ে দিতেই বাবলু শুনল, ঝাঁঝি পোকাগুলো কথা বলছে।

পোকা চাই। খাবার জন্যে পোকা চাই। এই লোকদুটি যাচ্ছে না কেন। কী করছে, কী করছে?

এরা দুজন কী করছে? পোকা চাই। পোকা চাই। পোকা চাই।

বাবলু স্তম্ভিত হয়ে গেল। লোকটি বলল, মানুষ যেভাবে কথা বলে এরা কিন্তু সেভাবে কথা বলে না। ডানার সঙ্গে ঘষে শব্দ করে। ভাবের আদান-প্রদানের কত অদ্ভুত ব্যবস্থাই না প্রাণিজগতে আছে!

বাবলু তার কথায় কান দিচ্ছিল না। কারণ, সে পরিষ্কার শুনতে পেল জামগাছের একটি পাখির বাসা থেকে ফিসফিস করে কথাবার্তা হচ্ছে। আহ, এই লোকদুটি কী বকবক শুরু করেছে, ঘুমুতে দেবে না নাকি?

ঠিক বলেছ। মানুষের মধ্যে কাণ্ডজ্ঞান বলে কিছুই নেই। এগুলো মহাবোকা।

বলতে বলতে পাখিগুলো খিকখিক করে হাসতে লাগল। লোকটি বলল, বাবলু যন্ত্রটা এবার খুলে ফেলা যাক। তোমার অভ্যাস নেই তো মাথা ধরে যাবে।

বাবলু বলল, আমি যদি ওদের সঙ্গে কথা বলি ওরা আমার কথা বুঝতে পারবে?

দু একটা কথা বুঝতে পারে। তবে বেশিরভাগই বুঝতে পারে না। ওদের বুদ্ধিবৃত্তি নিম্নস্তরের। অবশ্য সবার না। পৃথিবীতে অনেক বুদ্ধিমান প্রাণী আছে, যেমন ধরো তিমি মাছ।

তিমি মাছ বুদ্ধিমান?

অত্যন্ত বুদ্ধিমান। শুধু হাত নেই বলে যন্ত্রপাতি তৈরি করতে পারে না। ডলফিনও খুব বুদ্ধিমান। ওদের যদি হাত থাকত তাহলে পৃথিবীর চেহারা পাল্টে যেত।

ওদের হাত নেই কেন?

প্রকৃতির খেয়াল। প্রকৃতির খেয়ালিপনার জন্যে তিমি এবং ডলফিনের মতো বুদ্ধিমান প্রাণীদেরও পশুর জীবনযাপন করতে হচ্ছে।

হইয়েৎসুন একটি ছোট নিশ্বাস ফেলে যন্ত্রটা বাবলুর কাঁধ থেকে নিয়ে এল।

এবার তোমার ব্যাপারটা চিন্তা করা যাক। কী ঠিক করলে? জাহাজের খালাসি হবে?

না।

তবে কী? অস্ব্ধকার জামগাছের নিচে বসে থাকবে?

উঁহুঁ আমি আপনার সঙ্গে যাব।

তাই বুঝি?

জি।

কিন্তু তা সম্ভব নয়। আমাদের চলাফেরার জন্য রকেট বা স্পেসশিপ নেই। এক জায়গা থেকে অন্য জায়গায় যাই সরাসরি বস্তু-স্থানান্তরণ প্রক্রিয়ায়। তোমাকে দিয়ে তা হবে না। তা ছাড়া আমি এখন যাব তোমাদের বৃহস্পতি গ্রহের একটি চাঁদে। তার নাম হচ্ছে টিটান। সেখানে অত্যন্ত বুদ্ধিমান প্রাণী আছে।

আমিও আপনার সঙ্গে টিটানে যাব।

একেবারেই অসম্ভব। সে-জায়গাটা বিষাক্ত ফ্লোরিন গ্যাসে ভরপুর। তার উপর আছে সালফার-ডাই-অক্সাইড। আমার তাতে কিছু হবে না। কিন্তু তুমি মারা যাবে সঙ্গে সঙ্গে।

বাবলু মুখ কালো করে চুপ করে রইল। লোকটা শান্তস্বরে বলল, তুমি বরং ভালোমতো পড়াশোনা শুরু করো। কারণ, তোমাদের এখনো অনেক কিছুই শেখার আছে। অঙ্কে সাড়ে আট পেলে হবে না।

বাবলু কোনো উত্তর দিল না। লোকটি বলল, মানুষের মস্তিষ্ক প্রথম শ্রেণীর। ইচ্ছে করলেই এরা জ্ঞানে-বিজ্ঞানে আমাদের ছাড়িয়ে যাবে।

বাবলু মুখ কালো করে বলল, আমি অঙ্কটঙ্ক কিছু শিখতে চাই না। হইয়েৎসুন হেসে ফেলল। হাসতে হাসতেই বলল, মানুষেরা প্রাণী হিসেবে কিন্তু খুব অদ্ভুত। এরা প্রায় সময়ই যা ভাবে তা বলে না। মুখে এক কথা বলে কিন্তু মনের কথা ভিন্ন। তুমি মনে মনে ভাবছ এখন থেকে খুব মন দিয়ে অঙ্ক শিখবে যাতে এ-ধরনের যন্ত্র বানাতে পারো, কিন্তু মুখে অন্য কথা। ঠিক না?

বাবলু থেমে বলল, আপনি কী করে বুঝলেন?

আমার কাছে ছোটখাটো একটা কমুনিকের যন্ত্র আছে। এ দিয়ে বুদ্ধিমান প্রাণীরা কী ভাবছে তা অনেক দূর থেকে টের পাওয়া যায়। যেমন ধরো যন্ত্রটা তোমার কাঁধে ঝুলিয়ে দিলে তুমি বুঝতে পারবে তোমার বাবা এবং তোমার ধীরেন স্যার এই মুহূর্তে কী ভাবছেন। তাঁরা দুজনই হারিকেন নিয়ে খুব ব্যস্ত হয়ে তোমাকে খুঁজে বেড়াচ্ছেন। তোমাদের স্কুলের দপ্তরি আনিস মিয়া বাসায় গিয়ে খবরটা দেবার পর থেকেই তোমার বাবা খুব অস্থির হয়ে পড়েছেন। তোমার বাবার মনের অবস্থাটা বুঝতে চাও?

বাবলু মাথা নড়ল। সে বুঝতে চায়। লোকটা যন্ত্রটা কাঁধে ঝুলিয়ে দিতেই বাবলু শুনল, বাবা মনে-মনে বলছেন, আমার পাগলা ছেলেটা কোন অস্ব্ধকারে একা-একা বসে আছে কে জানে। আট পেয়েছ তো কী হয়েছে। আহা বেচার! আমার ভয়ে বাড়িও আসতে পারছে না। নাহ্ আর কোনোদিন রাগারাগি করব না।

ভাবতে ভাবতে বাবা চোখ মুছলেন।

ধীরেন স্যারও ঠিক একই রকম কথা ভাবছেন- আহারে বাচ্চা ছেলেটা কোথা-না-কোথায় বসে আছে অশ্রুকারে। খাতায় লেখাটা অন্যায় হয়েছে খুব। সেই লজ্জাতেই বাড়ি যাচ্ছে না। নাহ্ ছাত্রদের সঙ্গে আরেকটু ভদ্র ব্যবহার করা দরকার। নাহ্ আর এইরকম রাগারাগি করব না। বাবলুটাকে রোজ এক ঘণ্টা করে অঙ্ক শেখাব।

হইয়েৎসুন হাসতে-হাসতে বলল : কি শুনলে তাদের মনের কথা?

হুঁ।

জাহাজের খালাসি হবার পরিকল্পনা এখনও আছে?

জি না।

ভালো। খুব ভালো। তা বাবলু সাহেব, আমার তো এখন যেতে হয়।

আরেকটু বসুন।

না আর বসা যাচ্ছে না। তোমার বাবা আর স্যার এদিকেই আসছেন। আমাকে দেখলে ব্যাপারটি ভালো হবে না। যাই তাহলে, কেমন।

তার কথা শেষ হবার আগেই বাবাকে এবং ধীরেন স্যারকে দেখা গেল। দস্তরি আনিস মিয়া একটি হারিকেন হাতে আগে-আগে আসছে। বাবলু ভিনগ্রুহের লোকটিকে আর দেখতে পেল না।

বাবা এসেই প্রচণ্ড একটি চড় বসালেন। রাগী-গলায় বললেন, এই বয়সে বাঁদরামি শিখেছিস। বাড়ি না গিয়ে গাছের নিচে বসে ধ্যান করা হচ্ছে। তোর পিঠের ছাল তুলব আজকে।

ধীরেন স্যার থমথম স্বরে বললেন, খারাপ পরীক্ষা হয়েছে, কোথায় তাড়াতাড়ি বাড়ি ফিরে বই নিয়ে বসবি, তা না সাপ-খোপের আড্ডার মধ্যে এসে বসা। আগামীকাল তুই সারা পিরিয়ড আমার ক্লাসে নীলডাউন হয়ে থাকবি। গরু কি আর সাথে লিখেছি?

বাবলু এদের কথায় একটুও রাগ করল না। কারণ, এখন সে নিশ্চিত জানে এসব তাদের মনের কথা নয়। তাছাড়া সে হারিকেনের আলোয় স্পষ্ট দেখল বাবার চোখ ভেজা। বাবা কাঁদতে-কাঁদতে তাকে খুঁজছিলেন।

### লেখক-পরিচিতি

হুমায়ূন আহমেদ ১৯৪৮ সালে ১৩ই নভেম্বর নেত্রকোনা জেলার মোহনগঞ্জে জন্মগ্রহণ করেন। পেশাগত জীবনে তিনি ঢাকা বিশ্ববিদ্যালয়ের শিক্ষক ছিলেন। লেখালেখি করা তাঁর নেশা, একজন জনপ্রিয় লেখক হিসেবে তিনি খ্যাত। বাংলা গদ্যসাহিত্যের প্রতিটি শাখায় তাঁর অবাধ বিচরণ। প্রথম উপন্যাস ‘নন্দিত নরকে’- লেখকশিবির পুরস্কারে সম্মানিত গ্রন্থ। তিনি বাংলা একাডেমী পুরস্কার, শিশু একাডেমী পুরস্কার এবং একুশে পদকপ্রাপ্ত লেখক। বিভিন্ন ছায়াছবিও নির্মাণ করেছেন তিনি। তাঁর নির্মিত ‘আগুনের পরশমণি’

১৯৯৫ সালে শ্রেষ্ঠ ছায়াছবি হিসেবে পুরস্কার পেয়েছে।

### সারসংক্ষেপ

বাবলু হাফ-ইয়ারলি পরীক্ষায় অঙ্কে সাড়ে আট পেয়েছে। অঙ্কের স্যার তার খাতার উপর বড় করে লাল পেনসিল দিয়ে ‘গরু’ লিখে দিয়েছেন এবং ক্লাসেও অপমান করেছেন। বাবলুর বাবাও সহজ পাত্র নন। তাই ভয়ে, দুঃখে, অভিমানে বাবলু ছুটির পর বাড়িতে না ফিরে একটি নির্জন স্থানে গাছের নিচে বসে রইল। রাতের অন্ধকারে তার সামনে ভিনগ্রহের এক পর্যটক এসে দাঁড়ালেন। তাঁর কাছে একটি কমুনিকিটর যন্ত্র আছে। বুদ্ধিমান প্রাণীরা কী ভাবে এ যন্ত্র দিয়ে দূর থেকে টের পাওয়া যায়। যন্ত্রটির মাধ্যমে বাবলু জানতে পারল তার বাবা ও অঙ্কের স্যার দুজনই তার জন্য খুব চিন্তিত এবং নিজেদের ব্যবহারের জন্য দুঃখবোধ করছেন। এরই মধ্যে স্যার ও বাবা বাবলুকে খুঁজতে খুঁজতে তার সামনে এসে গেলেন। বাবলু ভিনগ্রহের ব্যক্তিটিকে আর দেখতে পেল না। বাবা এবং স্যার দুজনই বাবলুকে দেখে খুব বকাবকি করতে লাগলেন। কিন্তু তাতে বাবলুর একটুও রাগ হল না। কারণ ইতোমধ্যে সে তাঁদের মনের কথা জেনে ফেলেছে। তাঁরা মুখে যা বলছেন তা মোটেই তাঁদের মনের কথা নয়। গুরুজনরা অনেক সময়ই ছোটদের বকাবকি করেন। সেটা তাদের ভালোর জন্যই করেন। প্রকৃতপক্ষে সব বাবা-মা তাঁদের সন্তানকে এবং শিক্ষক তাঁদের ছাত্রকে ভালোবাসেন।

### শব্দার্থ

**নাট্যশালা** - নাটক, অভিনয়, নৃত্যগীতবাদ্য করার স্থান বা ঘর। **দুগ্ধপোষ্য শিশু** - যে শিশুকে শুধুই দুধ খাইয়ে পালন করতে হয়। **বাহুল্য** - অতিরিক্ত, বহুলতা, আধিক্য। **মিক্সিয়ে গ্যালাক্সি** - ছায়াপথ, আকাশ গঙ্গা। **সৌরমণ্ডল** - সূর্য ও তার গ্রহ-উপগ্রহসমূহ। **নিওরন** - মায়ুর এক ধরনের কোষ। **রকেট বা স্পেসশিপ** - মহাশূন্যযান, মহাকাশযান। **কমুনিকিটর যন্ত্র** - যোগাযোগ যন্ত্র। **ধ্যান** - গভীর চিন্তা। **নীল ডাউন** - হাঁটুর উপর ভর দিয়ে দাঁড়ানো।



## অনুশীলনী

### বহুনির্বাচনি প্রশ্ন

১. কোন পরীক্ষায় বাবলু অঙ্কে ফেল করেছে-  
 ক. বার্ষিক  
 গ. ২য় সাময়িক  
 খ. প্রথম সাময়িক  
 ঘ. ষান্মাসিক
২. ঠান্ডা আবহাওয়াতে বাবলু ঘামতে লাগল। কারণ -  
 ক. তার বাবা তাকে আরো কঠিন শাস্তি দিবেন  
 খ. তার মা তাকে আরো কঠিন শাস্তি দিবেন  
 গ. পরের ক্লাসে প্রমোশন পাবে

### নিচের অংশটুকু পড় এবং ৩-৫ নম্বর প্রশ্নের উত্তর দাও :

বাবলু খাতাটা বের করে লোকটির দিকে দিল। বেশ লম্বা, চশমা পরা লোকটি খাতাটি নিয়ে গম্ভীর স্বরে বলল, খাতার উপর গুরু লেখাটা অন্যায় হয়েছে। বুদ্ধিবৃত্তির উপর সরাসরি কটাক্ষ করা হয়েছে। তাছাড়া এত বড় করে লেখার প্রয়োজনই-বা কী? ছোট করে লিখলেই হত। বাবলু শব্দ করে কেঁদে উঠল।

৩. উদ্ভূতাত্মকের লোকটি কে?  
 ক. বাবলুর শিক্ষক  
 গ. একজন পথচারী  
 খ. বাবলুর বাবা  
 ঘ. ঝোপের কাছের লোকটি
৪. খাতার উপর শিক্ষক 'গুরু' লিখার কারণ  
 i. ছাত্রকে অপমান করা  
 ii. ছাত্রকে তিরস্কার করা  
 iii. ছাত্রকে অধ্যবসায়ী হতে উৎসাহিত করা

### নিচের কোনটি সঠিক?

- ক. i  
 গ. i ও ii  
 খ. ii  
 ঘ. iii
৫. বাবলু শব্দ করে কেঁদে উঠল-  
 ক. রাগে অভিমানে  
 গ. ভবিষ্যৎ চিন্তায়  
 খ. অনুশোচনায়  
 ঘ. লোকটির সহানুভূতির স্পর্শে

### সৃজনশীল প্রশ্ন

১. লোকটি বলল, মানুষের মস্তিস্ক প্রথম শ্রেণীর। ইচ্ছা করলে এরা সকলকে ছাড়িয়ে যেতে পারে। বাবলু মুখ কালো করে বলল, আমি অঙ্কটঙ্ক কিছু শিখতে চাই না। হইয়েৎসুন হেসে ফেলল। হাসতে হাসতে বলল মানুষেরা প্রাণী হিসেবে কিন্তু খুব অন্ভুত। এরা প্রায় সময়েই যা ভাবে তা বলে না। মুখে এক কথা বলে কিন্তু মনের কথা ভিন্ন। তুমি এ মুহূর্তে ভাবছ এখন থেকে খুব মন দিয়ে অঙ্ক শিখবে যেন এ ধরনের যন্ত্র বানাতে পার, কিন্তু মুখে অন্য কথা, ঠিক না? বাবলু বলল, আপনি কী করে বুঝলেন? আমার কমুনিকেশনের যন্ত্রের সাহায্যে।
  - ক. উদ্ভূতাত্মকের হইয়েৎসুন কে?
  - খ. বাবলুর মনের সর্বশেষ প্রকৃত অবস্থার বর্ণনা দাও।
  - গ. মানুষ সম্পর্কে হইয়েৎসুনের মন্তব্য বাবলুর উপর যে প্রভাব ফেলে তার বর্ণনা দাও।
  - ঘ. ‘মানুষ ইচ্ছা করলে সকলকে ছাড়িয়ে যেতে পারে’- তোমার পঠিত গল্পের আলোকে বিশ্লেষণ কর।
২. প্রথম সাময়িক পরীক্ষায় আশরাফ ইংরেজিতে ফেল করায় শিক্ষক শ্রেণীকক্ষে তাকে তিরস্কার করেন। স্কুল শেষে বাসায় ফেরার সময় শিক্ষক তাকে স্কুল গেটে দেখে জিজ্ঞাসা করলেন, কিরে বাড়ি যাসনি? এ কথায় আশরাফ কেঁদে ফেলল। শিক্ষক বিষয়টি উপলব্ধি করতে পারলেন। তাকে আদর স্নেহ করে বাড়ি পাঠিয়ে দিলেন। সন্ধ্যার পর তিনি আশরাফের বাবার সংগে সাক্ষাৎ করে আশরাফ-এর দুর্বল দিকগুলো তার কাছে তুলে ধরেন এবং আদর স্নেহের মাধ্যমে তার প্রতি যত্নবান হতে পরামর্শ দেন। এ উপদেশ আশরাফের জীবনে জাদুর মত কাজ করে। সে আর ইংরেজিতে ফেল করে না।
  - ক. শিক্ষক আশরাফকে তিরস্কার করার কারণ কী?
  - খ. স্কুল গেটে শিক্ষক আশরাফকে আদর করার মূল উদ্দেশ্য কী-বর্ণনা কর।
  - গ. শিক্ষকের আচরণ আশরাফের শিক্ষাজীবনে যে প্রভাব ফেলে তা যুক্তিসহ উপস্থাপন কর।
  - ঘ. উদ্দীপকে যে শিক্ষকের কথা বলা হয়েছে তার সম্পর্কে তোমার অভিমত ব্যক্ত কর।

# ঋণ পরিশোধ

মোহাম্মদ নাসির আলী



তখন বাদশাহ আকবরের রাজত্বকাল। দিল্লিতে তাঁর রাজধানী। ইতিহাসে নিশ্চয়ই পড়েছে, বাদশাহ আকবর খুব বুদ্ধিমান ছিলেন, রাজ্য চালাবার দক্ষতাও তাঁর যথেষ্ট ছিল। যদিও নিজে তেমন বিদ্বান ছিলেন না, তবুও বিদ্বান ব্যক্তিত্বকে যথেষ্ট কদর করতেন তিনি। গুণী, বিদ্বান, বুদ্ধিমান লোকদের জাতি-ধর্ম বিচার না করে নিজের দরবারে এনে তিনি পরম সমাদরে ঠাঁই দিতেন। আবুল ফজল, মোল্লা দোপিয়ারাজা, রাজা মানসিংহ, খান খানান, কবি গজা, ফৈজী, তানসেন, বীরবল ও তোডরমল— এই নয় জন বিশেষ জ্ঞানীলোক ছিলেন তাঁর দরবারে। তাঁদের ভেতর গীতশিল্পী, চিত্রশিল্পী, রাজনীতিবিদ, হাস্যরসিক, ইতিহাসবিদ—সবাই ছিলেন। এক-এক বিষয়ে এক-একজন ছিলেন যেন একটি অমূল্য রত্ন। তাই তাঁদের নয় জনের দলটিকে বলা হত ‘নবরত্ন’।

বাদশাহ আকবরের এ-নবরত্নের এক জন ছিলেন এক গরিব ব্রাহ্মণ। তিনি হাস্যরসিক ছিলেন আর খুব গল্প বলে আসর জমাতে পারতেন। তাই যতই দিন যেতে লাগল বাদশাহ এ-ব্রাহ্মণের ওপর ততই খুশি হয়ে উঠলেন। একদিন তাঁর গল্প শুনে তিনি বললেন : তোমার গল্প শুনে আজ যেমন হেসেছি, তেমন জীবনে কোনোদিন হেসেছি বলে তো মনে পড়ে না। তুমি যা বখশিশ চাইবে, তা-ই দেব তোমাকে। কী চাও তুমি?

ব্রাহ্মণ তখন উঠে বাদশাহকে কুর্নিশ করে বললেন : শাহানশাহ, সত্যিই যদি গরিবের ওপর খুশি হয়ে থাকেন, তা হলে আপনার জল্লাদকে হুকুম করুন আমার পিঠে চাবুকের একশ ঘা দিতে। তা-ই হবে আমার মনের মতো বখশিশ।

বাদশাহ এ-কথা শুনে তাজ্জব হয়ে চেয়ে রইলেন তাঁর মুখের দিকে। আমীর-ওমরাহ যাঁরা হাজির ছিলেন তাঁরাও অবাক! কে কবে শুনেছে চাবুকের ঘা চেয়ে নিতে বখশিশের বদলে?

বাদশাহ পুনরায় বললেন : কী তুমি চাও ঠিক করে বল। চাবুকের ঘা কি কখনও বখশিশ হতে পারে? নিশ্চয়ই তুমি হাসি-তামাশা করছ।

ব্রাহ্মণ করজোড়ে বললেন : হুজুরের সঙ্গে হাসি-তামাশা করব তেমন বেয়াদব আমি নই। হয়তো আমিই প্রথম ব্যক্তি যে জাঁহাপনার কাছে এমন আজব ধরনের বখশিশ চেয়ে নিতে পারি। কিন্তু আমি সত্যিই বলছি, একান্ত যদি আমাকে বখশিশ দিতে হয় তবে যা চেয়েছি তা-ই দিন। আর তা যদি না দিতে হয়, কিছুই দেবেন না জাঁহাপনা।

বাদশাহ কিছুতেই রাজি হন না বেকসুর একটা লোকের পিঠে চাবুক মারার হুকুম দিতে। বখশিশ দিতে চেয়ে সাজা কী করে দেবেন?

দরবারে নানারকম লোকই ছিল। কেউ-কেউ ছিল হিংসুটে। অল্পদিন হল ব্রাহ্মণ এসেছেন শাহি দরবারে; কিন্তু এরই ভেতর তিনি বাদশাহর প্রিয়পাত্র হয়ে উঠেছেন। ব্রাহ্মণের এ-সৌভাগ্যে তারা তাঁকে হিংসে করত। হিংসেয় জ্বলেপুড়ে মরত। তাদেরই একজন টিম্পনী কাটল : হয়তো বামুন ভেবেছে, চাবুকের পিটুনি খেয়ে ওর বুদ্ধি আরও খুলবে।

ব্রাহ্মণ তার দিকে ফিরে বললেন : সত্যিই তা-ই। সেজন্যই ওস্তাদ তাঁর শাগরেদদের বেতের পিটুনি দেন। কোনো-না-কোনো লোক পিটুনি খেয়েই শেখে। রোগ সারাতে পিটুনি যে কেমন ভালো ওষুধ একটু পরেই আপনারা তা দেখতে পাবেন।

বাদশাহ দেখলেন উপায়ান্তর নেই। ব্রাহ্মণ নাছোড়বান্দা, কিছুতেই তাঁর কথার নড়চড় হতে দেবেন না। অবশেষে নাচার হয়ে তিনি ব্রাহ্মণের পিঠে চাবুক মারতেই হুকুম দিলেন।

জল্লাদ এসে বেচারা ব্রাহ্মণকে চাবুক মারতে শুরু করল- শপাং শপাং। পঞ্চাশ ঘা মারবার পরে হঠাৎ ব্রাহ্মণ হাত উঠিয়ে বলে উঠলেন : থামো, থামো, আর নয়।

বাদশাহও বললেন : থামাও থামাও, আর মেরো না। এবার বুঝি বামুনের সুবুন্দির উদয় হয়েছে!

ব্রাহ্মণ বললেন : শাহানশাহ এবার আমার ঋণ পরিশোধের পালা। আমার এক বন্ধু আছে, তার কাছে প্রতিজ্ঞা করেছি, আমার বখশিশের অর্ধেক আমি তাকে দেব। আমার সেই বন্ধুটিকে এবার এখানে আনতে অনুমতি দিন। সে বাইরে দাঁড়িয়ে আছে।

ব্রাহ্মণের কথা শুনে আবার সবাই অবাক হয়ে রইল। বাদশাহ ভাবলেন, একটা রহস্য আছে এর ভেতর। তাই অনুমতি দিতে বিলম্ব হল না। ব্রাহ্মণ তখন বাইরে গিয়ে ডেকে নিয়ে এলেন দেউড়িতে পাহারারত বিশালদেহী এক দারোয়ানকে। এনে বললেন ; এই আমার সেই বন্ধু, শাহানশাহ। আমার বখশিশের অর্ধেক প্রাপ্য এ-বন্ধুটির।

দারোয়ানকে দেখে বাদশাহ আকবর তাজ্জব হয়ে গেলেন। ব্যাপার কী! তাঁর দারোয়ান কী করে এ বিদেশী ব্রাহ্মণের বন্ধু হতে পারে?

ব্রাহ্মণ তখন সব কথা বুঝিয়ে বলতে লাগলেন : দিল্লি থেকে অনেক দূরে কালপী নামক এক গ্রামে আমার বাস। অত্যন্ত গরিব আমি। বরাবর শাহানশাহর গুণগ্রাহিতার কথা শুনে আসছি। কিন্তু শাহি দরবারে হাজির হবার ভাগ্য বা সুবিধা কখনও হয়নি। একবার তাই ভারি ইচ্ছে হল দিল্লি আসতে। তারপর সত্যি একদিন পায়ে হেঁটে দিল্লি এসে হাজির হলাম। অনেক দূর হেঁটে অত্যন্ত ক্লান্ত হয়েছি, কিন্তু মনে তবু অপার আনন্দ, এতদিনে মনের বাসনা পূর্ণ হল। দিল্লি এলাম। একপা-দুপা করে শাহি-মহলের দিকে ভয়ে-ভয়ে এগোচ্ছি। দেউড়ির কাছে আসতেই পথ আগলে দাঁড়াল হুজুরের বিশালবপু এই দারোয়ান।

ধমক দিয়ে বলল : কোথায় যাচ্ছ? আমি চমকে গেলাম। মিনতি করে বললাম : অনেক দূরদেশ থেকে পায়ে হেঁটে এসেছি বাবা, শাহানশাহ আকবরকে একটিবার চোখে দেখতে। আমার এ-কথায় দারোয়ানের মন ভিজল না। সে অনেক টাকা বখশিশ চেয়ে বসল। বখশিশ না পেয়ে কাউকেই নাকি সে দরবারে ঢুকতে দেয় না। এদিকে আমার সঙ্গে নেই একটিও কানাকড়ি। কী বখশিশ দেব দারোয়ানকে? অবশেষে ভাবতে-ভাবতে হঠাৎ এক বুদ্ধি খেলে গেল মাথায়। বললাম : ট্যাকে যে কিছু নেই তো দেখতেই পাচ্ছ। তবে হ্যাঁ, আশা আছে বাদশাহর দরবারে ঢুকে তাঁকে সন্তুষ্ট করতে পারলে কিছু এনাম নিশ্চয়ই পাব। যা-কিছু আমি পাই তার অর্ধেক তোমাকে দেব বলে ওয়াদা করছি। আমার এ-সজ্জাত প্রস্তাবে হুজুরের দয়ালু দারোয়ান রাজি হল। রাজি হয়ে আমাকে দরবারে ঢুকতে দিল। সে-অবধি দরবারে যাতায়াত করছি। এতদিন হুজুরের নেকনজর আমার ওপর পড়েনি বলে ঋণ শোধেরও কোনো উপায় হয়নি। এ দারোয়ানের দিন কেটেছে আশায় আশায়। হুজুরের দয়ায় আজ আমার সে-ঋণ পরিশোধের সুযোগ এসেছে।

এটুকু বলে ব্রাহ্মণ হতভম্ব দারোয়ানের দিকে চেয়ে বললেন : বাদশাহ খুশি হয়ে আজ আমাকে একশ চাবুকের ঘা বখশিশ দিতে রাজি হয়েছেন। তার অর্ধেক আমি নিয়েছি। এবার বাকি অর্ধেক তোমাকে দেওয়ার পালা।

ব্রাহ্মণের কথা শুনে উপস্থিত আরও অনেকে দারোয়ানের নামে নালিশ করল। তারাও দারোয়ানকে বখশিশ দিয়েই দরবারে ঢুকেছে। এসব শুনে আকবর গেলেন ভীষণ চটে। তিনি হুকুম দিলেন : ওকে আছা করে পঞ্চাশ ঘা চাবুক মেরে রাজ্যের বাইরে তাড়িয়ে দাও।

চাবুকের পিটুনি দেওয়ার কথা শুনে যে-লোকটা ব্রাহ্মণকে ঠাট্টা করছিল, এবার তার দিকে ফিরে ব্রাহ্মণ বললেন : চাবুকের ঘা খেয়ে মানুষের জ্ঞানবুদ্ধি বাড়ে কিনা, দারোয়ানকে দেখে শিখে নিন।

সেদিনই দারোয়ানকে চাবুক মেরে তাড়িয়ে দেওয়া হল। এ- ব্রাহ্মণ লোকটি কে তোমরা বোধহয় বুঝতে পেরেছ। ইনিই বিখ্যাত হাস্যরসিক বীরবল। দরবারের অনেকেই তাঁকে ভালোবাসত। বাদশাহ্ সেদিন থেকে তাঁকে নবরত্নের এক জন করে নিলেন। তাঁকে অনেক টাকা বখশিশ দিলেন।

### লেখক-পরিচিতি

মোহাম্মদ নাসির আলী ১৯১০ সালের ১৫ই জানুয়ারি ঢাকার বিক্রমপুরে জন্মগ্রহণ করেন। তিনি একজন শিশুসাহিত্যিক, অনুবাদক ও পুস্তক প্রকাশক। তাঁর সমস্ত ভাবনা, কল্পনা, সৃষ্টির প্রয়াস ছিল ছোটদের জন্য। তাঁর কয়েকটি জনপ্রিয় গ্রন্থ হচ্ছে: ‘আলী বাবা’, ‘আকাশ যারা করল জয়’, ‘লেবু আমার সপ্তকাণ্ড’, ‘শাহী দিনের কাহিনী’, ‘ইবনে বতুতার সফর নামা’, ‘তিমির পেটে কয়েক ঘটনা’, ‘ভিন দেশী এক বীরবল’। শিশুসাহিত্যের জন্য তিনি বাংলা একাডেমী পুরস্কার (১৯৬৭) ও ইউনেস্কো পুরস্কার (১৯৬৮) লাভ করেন। ১৯৭৫ সালে ৩০ শে জানুয়ারি তিনি মৃত্যুবরণ করেন।

### সারসংক্ষেপ

বাদশাহ আকবরের রাজদরবারে নয় জন বিশেষ জ্ঞানী লোক ছিলেন। এ দলটিকে বলা হত ‘নবরত্ন’। এক-এক বিষয়ে এক-এক জন ছিলেন যেন একটি অমূল্য রত্নবিশেষ। বিখ্যাত হাস্যরসিক বীরবল এ নবরত্নের এক জন। তিনি সরস গল্প বলে আসর জমাতে পারতেন এবং এ রসাল গল্পের মাধ্যমে মানুষের ভুলত্রুটিগুলো তুলে ধরে তাদের উপযুক্ত শিক্ষা দিতেন। তেমনি একটি রসাল ঘটনার অবতারণা করে তিনি রাজদরবারে নিজের স্থায়ী আসন গড়ে নিলেন এবং বাদশাহর দুই চরিত্রের দারোয়ানকে উপযুক্ত শিক্ষা দিলেন। ‘ঋণ পরিশোধ’ কাহিনীতে মোহাম্মদ নাসির আলী সুন্দর ও শিক্ষণীয় এ ঘটনাটি তুলে ধরেছেন।

### শব্দার্থ ও টীকা

**নবরত্ন** - নয়টি রত্ন। বাদশাহ আকবরের রাজদরবারে নয় জন বিশেষ জ্ঞানী লোক ছিলেন। এই দলটিকে নবরত্ন বলা হত। **জল্পাদ (আরবি শব্দ)** - ঘাতক, মৃত্যুদণ্ডপ্রাপ্ত ব্যক্তিকে যে বধ করে। **তাজ্জব (আরবি শব্দ)** - বিস্ময়জনক, অদ্ভুত। **আমির (আরবি শব্দ)** - সম্ভ্রান্ত ধনী মুসলমান, বড়লোক। **ওমরাহ (আরবি শব্দ)** (আমির-এর বহুবচন) উচ্চপদস্থ ব্যক্তি (মুসলমান রাজ্যে)। **শাগরেদ (ফারসি শব্দ)** - শিষ্য। **নাছোড়বান্দা** - যে ছাড়বার পাত্র নয়। **রহস্য** - গূঢ় বা গুপ্ত তত্ত্ব, গূঢ় মর্ম। **পরিহাস** - রসিকতা। **দেউড়ি (দেহলি)** - বাড়ির প্রবেশদ্বার, ধনিগৃহের ছাদযুক্ত তোরণ। **বাসনা**- অভিলাষ, কামনা, প্রত্যাশা। **বখশিশ (ফারসি শব্দ)** - পারিতোষিক। **হতভম্ব** - কিংকর্তব্যবিমূঢ়। কী করতে হবে তা বুঝতে না পারা।

## বহুনির্বাচনি প্রশ্ন

- নিচের কোনটি সঠিক

- ### সৃজনশীল প্রশ্ন

- ক. নবরত্ন কী?  
খ. বীরবল কীভাবে নবরত্নের সদস্য হন?  
গ. বীরবল দারোয়ানকে যে শিক্ষা দেন তা থেকে আকবরের সভাসদ কীভাবে উপকৃত হয়েছিল বলে তুমি মনে কর।  
ঘ. বীরবলের বিচক্ষণতা ‘ঋণ পরিশোধ’ গল্পে কীভাবে তুলে ধরা হয়েছে তা বিশ্লেষণ কর।

# রাখালের বুদ্ধি

ভিনদেশী রূপকথা



এক দেশের মন্ত্রী একটা খুব বড় রকমের অপরাধ করেছিলেন। মন্ত্রী সে দেশের রাজার কাছে অনেক ক্ষমা চাইলেন, বললেন অমন ভুল আর কোনো দিন করবেন না। তখন রাজা বললেন, ‘বেশ, তোমাকে ক্ষমা করব, যদি তুমি আমার তিনটি প্রশ্নের উত্তর দিতে পার। তোমাকে তিন মাস সময় দিচ্ছি। প্রথম প্রশ্ন : কত দিনে আমার মৃত্যু হবে, দ্বিতীয় প্রশ্ন : ঠিক কত সময়ে আমি সারা পৃথিবী ঘুরে আসতে পারব, তৃতীয় প্রশ্ন : যেদিন তুমি এইসব প্রশ্নের উত্তর নিয়ে আমার কাছে আসবে সেদিন বলতে হবে সেই মুহূর্তে আমি কী ভাবছি, এবং তা যে ভুল তা প্রমাণ করতে হবে।’

প্রশ্ন শুনে মন্ত্রীর যেন মাথায় বাজ ভেঙে পড়ল। দেশ-বিদেশের কত জ্ঞানী গুলীর সঙ্গে দেখা করলেন, কিন্তু একটা প্রশ্নেরও উত্তর পেলেন না। দিন যায়, দিনের পর মাস। তিন মাস পূর্ণ হতে যখন আর মাত্র কয়েকটা দিন বাকি, তখন এক রাখালের সঙ্গে তাঁর দেখা হল। রাখাল তো প্রথমে চিনতেই পারেনি তাঁকে, যখন চিনতে পারল, অত্যন্ত আশ্চর্য হয়ে গেল। বলল, ‘এ কী মন্ত্রীমশাই, হায় হায়, আপনার এ কী চেহারা হয়েছে?’ মন্ত্রীমশায়ের কাছে তাঁর দুঃখের কাহিনী শুনল রাখাল। বলল, ‘ওঃ এই ব্যাপার? কিছু ভাববেন না মন্ত্রীমশাই, আমি আপনার সঙ্গে দেখা করব। আমার কথামত কাজ করবেন, দেখবেন সব ঠিক হয়ে যাবে।’



তিন মাস যেদিন শেষ হল, মন্ত্রীমশাইকে নিয়ে রাখাল গেল রাজসভায়- মন্ত্রীমশাই সেজেছেন রাখাল, আর রাখাল সেজেছে মন্ত্রীমশাই।

মন্ত্রীকে দেখে রাজা হেসেই ফেললেন। বললেন, ‘বাঃ মন্ত্রী, খাসা চেহারা বানিয়েছ তো! আমার প্রশ্নের উত্তর প্রস্তুত?’ ‘হ্যাঁ মহারাজ, প্রস্তুত। আপনার প্রথম প্রশ্ন- আপনি ঠিক কতদিন বাঁচবেন। তার উত্তর হল, আপনি ঠিক ততদিনই বাঁচবেন যতদিন না আপনার শেষ নিশ্বাস পড়ছে, শেষ নিশ্বাস পড়ার আগে কোনোমতেই আপনার মৃত্যু হবে না।’

রাজা বললেন, ‘বাঃ মন্ত্রী, সাবাস! ঠিক উত্তর দিয়েছ। বেশ, এবার দ্বিতীয় প্রশ্নের উত্তর দাও।’

‘মহারাজ, আপনার প্রশ্ন হচ্ছে, সারা পৃথিবী ঘুরে আসতে আপনার কত সময় লাগবে। এর উত্তর হল, যদি আপনি সূর্য ওঠার সঙ্গে সঙ্গে সূর্যের সঙ্গে সমান বেগে চলতে থাকেন তাহলে পরদিন সকালে সূর্য ওঠার সময় পৃথিবী ঘুরে আসতে ঠিক চব্বিশ ঘণ্টা সময় লাগবে।’

এ উত্তরও রাজার পছন্দ হল। তিনি বললেন, ‘বেশ, এবার শেষ প্রশ্ন। বল এই মুহূর্তে আমি কী ভাবছি, আর যা ভাবছি তা যে মিথ্যা তা প্রমাণ কর।’

উত্তরে মন্ত্রীবেশী রাখাল বলল, ‘মহারাজ, আপনি অবাক হয়ে ভাবছেন, আপনার অমন নাদুস নুদুস মন্ত্রী কেমন করে এমন রোগাপটকা হয়ে গেল।’

রাজা বললেন, ‘সত্যিই তো, সে-কথাই তো আমি ভাবছি। বেশ, এবার প্রমাণ কর যা ভাবছি তা ঠিক নয়।’

‘এই দেখুন প্রমাণ, মহারাজ।’ এই বলে মন্ত্রীবেশী রাখাল এক টানে তার মন্ত্রীর পোশাক খুলে ফেলল।

রাখালের পোশাক পরা মন্ত্রী কাঁচুমাঁচু হয়ে সভার এক কোণে দাঁড়িয়ে দাঁড়িয়ে কাঁপছিলেন, ছদ্মবেশ খুলে ফেললেন তিনি। বললেন, ‘মহারাজ, দেখুন তো, চিনতে পারেন কি আপনার মন্ত্রীকে? আসলে মন্ত্রী হলাম আমি, যাকে আপনি মন্ত্রী বলে মনে করেছিলেন সে নয়।’

মহারাজ যখন শুনলেন এই রাখালের বুদ্ধিতেই মন্ত্রীর প্রাণরক্ষা হল তখন তাকে অনেক ধনরত্ন দিলেন, আর মন্ত্রীর সব অপরাধ ক্ষমা করলেন।

### সারসংক্ষেপ

এক দেশের এক মন্ত্রী বড় রকমের অপরাধ করেছিলেন। এতে ঐ দেশের রাজা তার উপর অত্যন্ত ক্রুদ্ধ হয়েছিলেন। মন্ত্রী রাজার কাছে ক্ষমা চেয়ে বললেন তিনি আর অমন ভুল করবেন না; তাকে যেন ক্ষমা করে দেওয়া হয়। রাজা মন্ত্রীকে শর্ত দিলেন, তিন মাসের মধ্যে তাঁর তিনটি প্রশ্নের উত্তর দিতে পারলে তিনি মন্ত্রীকে ক্ষমা করে দেবেন। অনেকের সঙ্গে দেখা করেও মন্ত্রী প্রশ্নের উত্তর জানতে পারলেন না। শেষে এক রাখালের সাথে তাঁর দেখা হল। রাখাল ছদ্মবেশে রাজদরবারে গিয়ে তার বুদ্ধি দিয়ে তিনটি প্রশ্নের উত্তর দিল। রাজা খুশি হয়ে মন্ত্রীকে ক্ষমা করলেন এবং রাখালকে অনেক ধনরত্ন উপহার দিলেন।

### শব্দার্থ

**মন্ত্রী** - রাজার পরামর্শদাতা। **ক্রুদ্ধ** - রাগ, গোসসা। **ক্ষমা** - দোষ বা অপরাধ মার্জনা। **মুহূর্ত** - নিমেষ, দিবা-রাত্রির ত্রিশ ভাগের এক ভাগ। **জ্ঞানী**- বুদ্ধিমান। **বুদ্ধি** - ধীশক্তি, জানবার বা বুঝবার ক্ষমতা। **গুণী**- গুণবান, অভিজ্ঞ। **রাখাল** - যে গরু চরায়। **খাসা** - উত্তম, গুণবান, পছন্দসই। **ছদ্মবেশ** - আত্মপরিচয় গোপনাক্ষেপে পরিধেয় বেশ। **ধনরত্ন** - সম্পদ।

## অনুশীলনী

### বহুনির্বাচনি প্রশ্ন

১. গল্পটির প্রধান চরিত্র কে ?  
 ক. মন্ত্রী  
 গ. রাখাল  
 খ. রাজা  
 ঘ. গুণীজন
২. মন্ত্রী কী অন্যায় করেছিল?  
 ক. রাজাকে অসম্মান করেছিল  
 গ. সুনির্দিষ্ট কাজটি করেননি  
 খ. দুর্নীতির আশ্রয় নিয়েছিল  
 ঘ. কী অন্যায় করেছিলেন তা বলা হয়নি
৩. কী করলে রাজা মন্ত্রীকে ক্ষমা করে দিবেন ?  
 ক. মন্ত্রী সারা পৃথিবী ঘুরে আসতে পারলে।  
 খ. রাজার তিনটি প্রশ্নের উত্তর দিতে পারলে।  
 গ. মন্ত্রী একজন বুদ্ধিমান রাখালকে নিয়ে আসতে পারলে।  
 ঘ. আর কোনো অপরাধ করবে না বলে কথা দিলে।
৪. রাজা মন্ত্রীকে যে তিনটি প্রশ্ন করেছিলেন তার একটি হল :  
 i. উত্তর দেয়ার দিন বলতে হবে রাজা কী ভাবছেন  
 ii. রাজার সে ভাবনা ভুল তা প্রমাণ করতে হবে  
 iii. মানুষের জীবনে শ্রেষ্ঠ সময় কোনটি

### নিচের কোনটি সঠিক ?

- |             |                |
|-------------|----------------|
| ক. i ও ii   | খ. i ও iii     |
| গ. ii ও iii | ঘ. i, ii ও iii |
৫. রাজার প্রশ্ন শুনে মন্ত্রী প্রথম কার সঙ্গে দেখা করলেন ?  
 ক. দেশের গুণীজনদের সঙ্গে  
 গ. শুভাকাঙ্ক্ষীদের সঙ্গে  
 খ. দরিদ্র এক কৃষকের সঙ্গে  
 ঘ. কোনো এক ঋষির সঙ্গে

### সৃজনশীল প্রশ্ন

১. নিচের অংশটুকু পড় এবং প্রশ্নগুলোর উত্তর দাও :

প্রশ্ন শুনে মন্ত্রীর যেন মাথায় বাজ ভেঙে পড়ল। দেশ-বিদেশের কত জ্ঞানী-গুণীর সঙ্গে দেখা করলেন, কিন্তু একটা প্রশ্নেরও উত্তর পেলেন না। দিন যায়, দিনের পর মাস পূর্ণ হতে যখন আর মাত্র কয়েকদিন বাকি, তখন এক রাখালের সঙ্গে তাঁর দেখা হল। বলল, ‘ওঃ এই ব্যাপার?’

- ক. মন্ত্রীকে যে কয়টি প্রশ্ন করা হয়েছে তার থেকে একটি প্রশ্নেরও উত্তর দিতে পারে নি কেন? বিচার বিশ্লেষণ কর।
- খ. মন্ত্রীর মাথায় বাজ ভেঙে পড়ার কারণ ব্যাখ্যা কর।
- গ. ‘ওঃ এই ব্যাপার?’ এই উক্তির মধ্যে রাখালের যে মনোভাবের পরিচয় পাওয়া যায় তা বিশ্লেষণ কর।
- ঘ. মন্ত্রীকে মহাবিপদ থেকে রক্ষার্থে রাখাল কীভাবে সাহায্য করল বর্ণনা কর।

# বালকের সততা

মোহাম্মদ লুৎফর রহমান



বড়বাজারে এক তাঁতির একখানা দোকান ছিল। একদিন দোকানে বেচাকেনা করার সময় একটা জ্বরুরি কাজে করিম বখ্শ বলে এক ছেলেকে দোকানে বসিয়ে রেখে তিনি কিছুক্ষণের জন্য বাইরে গেলেন। করিম বখ্শ এক ঘণ্টা দোকানে বসে থাকল, কিন্তু তবুও দোকানদার ফিরে এল না। এদিকে ক্রেতারা জিনিসপত্রের জন্য তাগাদা দিতে লাগল। করিম বখ্শের জিনিসপত্রের দাম জানা ছিল, সে কয়েকখানা কাপড় বিক্রি করল। দুঃখের বিষয় সারা দিন চলে গেল তবুও দোকানদার ফিরে এল না। করিম অগত্যা সেদিন আর বাড়ি ফিরতে পারল না। দোকানদারের অপেক্ষায় সেখানেই রাত্রি যাপন করল।

পরের দিন যথাসময়ে দোকান খুলে করিম মালিকের অপেক্ষা করতে লাগল, কিন্তু মালিকের সম্ভান নেই। করিম অগত্যা নিজেই দোকানে বেচাকেনা করতে লাগল।

এভাবে দুদিন, তিন দিন, শেষে এক মাস কেটে গেল। তাঁতি ফিরল না। করিম দোকানের ভার ফেলে যাওয়া অধর্ম মনে করে বিশৃঙ্খল ভৃত্যের মত কাজ চালাতে লাগল। তাঁতি যাদের কাছে ঋণী ছিল, করিম তাদের সব

টাকা পরিশোধ করল। তাঁতির হয়েই সে নতুন কাপড়ের চালান এনে দোকানের আয় ঠিক রাখল। এক বছর অতিবাহিত হয়ে গেল। করিমের আন্তরিক চেষ্টায় দোকানের ক্রমেই উন্নতি হচ্ছিল। শেষে এক দোকানের পরিবর্তে তিনটি দোকান স্থাপিত হল। করিম সব দোকান তাঁতির নামে চালাতে লাগল।

লোকেরা ভাবল, করিম তাঁতির দোকান কিনে নিয়েছে। করিমের সম্মান প্রতিপত্তি ইত্যবসরে খুব বেড়ে গেল। সে মস্ত সওদাগর হয়ে বিরাট কারবার চালাতে লাগল।

প্রায় সাত বছর অতিবাহিত হয়ে গিয়েছে। একদিন করিম দোকানের গদিতে বসে আছে। একজন বুড়ো লাঠি ভর করে তারই দোকানের সামনে করিম বলে একটা বালকের খোঁজ করছে। বুড়োর পরনে একখানা ময়লা কাপড়, রোগা চেহারা, শরীর একেবারে ভেঙে গিয়েছে। তাকে পথের ভিক্ষুক বলে মনে হচ্ছিল। করিম দৌড়ে এসে বুড়োকে বুকের সঙ্গে আঁকড়ে ধরে বলল, “আমি হচ্ছি সেই করিম, এই সাত বছর আমি আপনার দোকান পাহারা দিয়েছি। দয়া করে এখন আপনি আপনার দোকানের ভার নিন, আমি বিদায় হই।”

করিমের মহৎপ্রাণের পরিচয় পেয়ে বৃন্দ্রের দুচোখ দিয়ে পানি পড়তে লাগল। বললেন— আমার আর কিছু দরকার নেই, এ সবই তোমার। আমার এ সংসারে যারা আপন ছিল, সবাই আমাকে ছেড়ে গেছে। এখন তুমিই আমার আপন। সেই সাত বছর আগের কথা, এখান থেকে বেরিয়ে পথে সংবাদ পেলাম আমার পত্নীর সাংঘাতিক পীড়া। কালবিলম্ব না করে আমাকে বাড়ি যেতে হয়েছিল। গিয়ে দেখলাম পত্নীর মৃত্যু হয়েছে। তার মৃত্যুর কয়েকদিন পরে ছেলে দুটো মারা গেল। তারপর নানা দুর্বিপাকে পড়ে আমি কিছুতেই বাড়ি ত্যাগ করতে পারলাম না। তারপর এই দীর্ঘ সময় অতিবাহিত হয়ে গিয়েছে। এখন আমার কেউ নেই।

আত্মীয়-স্বজন, অর্থ, দেহের বল সব হারিয়ে এখন আমি পথের ফকির হয়েছি। অতি দুঃখে অনেক আশা-নিরাশায় মনে হল দোকানে গিয়ে একবার করিমের সন্ধান করি, তাকে যদি পাই তার কাছ থেকে দু-এক টাকা ভিক্ষে নেব। দোকান কি আর এতদিন আছে? করিম, আমি তোমাকে এমন রাজার হালে দেখব এ কখনও মনে করিনি। আর তুমি যে এমন করে আমার কাছে পরিচয় দিলে এ ভেবে আমার মনে যে কী আনন্দ হচ্ছে তা আর কী বলব। বল বাবা, তুমি মানুষ না ফেরেশতা!

করিম সবিনয়ে বলল, আপনি আমার পিতার মতো আমাকে বিশ্বাস করেছিলেন, সে বিশ্বাসকে আমি রক্ষা করতে পেরেছি এই আমার পক্ষে ঢের। এর বেশি আমি কিছু আশা করিনি।

তাঁতি করিমের হাত থেকে দোকানের ভার গ্রহণ করলেন না। জীবনে তার আর বন্দন রইল না। একটা মাসিক বন্দোবস্ত করে তিনি অতঃপর তীর্থে চলে গেলেন।

### লেখক-পরিচিতি

ডা. লুৎফর রহমান ১৮৮৯ সালে মাগুরা জেলায় জন্মগ্রহণ করেন। লেখাপড়া শেষ করে প্রথম জীবনে কিছুদিন শিক্ষকতা করেন। পরে ডাক্তারি (হোমিওপ্যাথি) পেশা গ্রহণ করেন। তিনি অনেক উপদেশমূলক প্রবন্ধগ্রন্থ রচনা করেন। ১৯৩৬ সালে এই সৃষ্টিশীল প্রাবন্ধিক মৃত্যুবরণ করেন। তাঁর বিখ্যাত গ্রন্থগুলোর মধ্যে উল্লেখযোগ্য কয়েকটি হচ্ছে— ‘উন্নতজীবন’, ‘মহৎজীবন’, ‘মানবজীবন’, ‘ধর্মজীবন’, ‘প্রীতিউপহার’।

### সারসংক্ষেপ

এক তাঁতির একটি কাপড়ের দোকান ছিল। একদিন জ্বরুরি কাজে তিনি দোকানের বাইরে গেলেন, দোকানের দায়িত্ব দিয়ে গেলেন করিম বখ্শ নামের এক ছেলেকে। নানা দুর্বিপাকে পড়ে দোকানি দীর্ঘদিন ফিরে আসতে পারলেন না। করিম সততার সাথে কাজ করে দোকানের অনেক উন্নতি করল। ক্রমে এক দোকানের পরিবর্তে তিনটি দোকান স্থাপিত হল। প্রায় সাত বছর পরে হঠাৎ দোকানি ফিরে এলেন। করিম সাদরে তাঁকে বরণ করে দোকানের দায়িত্ব তাঁর হাতে তুলে দিতে আগ্রহী হল। করিমের মহৎপ্রাণের পরিচয় পেয়ে বৃন্দ দোকানি অভিভূত হলেন। নিজের জন্য একটা মাসিক বন্দোবস্ত করে, করিমের হাতেই দোকান বুঝিয়ে দিয়ে তিনি তীর্থে চলে গেলেন। বালক তার সততার পুরস্কার পেল।

### শব্দার্থ ও টীকা

অগত্যা - বাধ্য হয়ে। বিশ্বস্ত - বিশ্বাসের পাত্র, বিশ্বাসযোগ্য। ইত্যবসরে - এ সময়ের মধ্যে, ইতোমধ্যে। বিলম্ব - দেরি। দুর্বিপাক - দুর্যোগ। অভিবাহিত - পার করা। সম্মান - খোঁজ। বন্দোবস্ত - ব্যবস্থা। অতঃপর - তারপর। প্রতিপত্তি - প্রতিষ্ঠা, সম্মান। তীর্থ - পুণ্যস্থান।

## অনুশীলনী

### বহুনির্বাচনি প্রশ্ন

অনুচ্ছেদটি পড় এবং ১-২ নম্বর প্রশ্নের উত্তর দাও :

করিম সবিনয়ে বলল, আপনি আমার পিতার মতো আমাকে বিশ্বাস করেছিলেন, সে বিশ্বাসকে আমি রক্ষা করতে পেরেছি-এই আমার পক্ষে ঢের। এর বেশি আমি কিছু আশা করিনি।

১. 'এর বেশি আমি কিছু আশা করিনি'- উক্তিটিতে করিম চরিত্রের কোন দিকটি প্রকাশ পেয়েছে ?

- পরোপকারিতা
- বিচক্ষণতা
- সততা


নিচের কোনটি সঠিক ?

- |             |                |
|-------------|----------------|
| ক. i ও ii   | খ. i ও iii     |
| গ. ii ও iii | ঘ. i, ii ও iii |

২. করিম কোন বিষয়টিকে দায়িত্ব ও কর্তব্য বলে মনে করেছিল ?

- |  |                                  |
|--|----------------------------------|
| ক. বৃন্দের সম্পত্তি রক্ষা করা          | খ. বৃন্দকে পিতার মত শ্রদ্ধা করা  |
| গ. বৃন্দের বিশ্বাসের মর্যাদা রক্ষা করা | ঘ. নিজের সততার পরিচয় প্রদান করা |

## সৃজনশীল প্রশ্ন



১. চিত্রটি লক্ষ কর এবং প্রশ্নগুলোর উত্তর দাও :

- ক. উদ্দীপকে চতুষ্কোণবিশিষ্ট শূন্যস্থানটিতে কোন নামটি বসাবে ?
- খ. সততাই বালক চরিত্রের শ্রেষ্ঠগুণ বুঝিয়ে লেখ ।
- গ. উদ্দীপকে উল্লিখিত চারটি গুণের কোনটি তোমাকে বেশি আকৃষ্ট করে-যুক্তিসহ উপস্থাপন কর ।
- ঘ. 'বালকের সততা' গল্পে করিমের সততা কীভাবে তাঁতি মূল্যায়ন করেছেন- বিশ্লেষণ কর ।

২. করিম, আমি তোমাকে এমন রাজার হালে দেখব এ কখনও মনে করিনি । আর তুমি যে এমন করে আমার কাছে পরিচয় দিলে এ ভেবে আমার মনে যে কী আনন্দ হচ্ছে তা আর কী বলব । বল বাবা, তুমি মানুষ না ফেরেশতা ।

- ক. কতদিন পরে বৃন্দ করিমের সাথে দেখা করলেন?
- খ. 'তুমি মানুষ না ফেরেশতা' মন্তব্যটির কারণ কী?
- গ. 'রাজার হালে' উন্নতি হবার পশ্চাতে করিমের কী কী গুণাবলি ছিল বলে তুমি মনে কর, উত্তরের স্বপক্ষে যুক্তি দেখাও ।
- ঘ. 'বালকের সততা' গল্পে করিমের সততা কীভাবে তাঁতি মূল্যায়ন করেছেন-বিশ্লেষণ কর ।

# কাঠের পা

আনোয়ারা সৈয়দ হক



আমার বাবা মুক্তিযোদ্ধা।

নয় নম্বর সেপ্টরে ক্যাপ্টেন শাজাহানের নেতৃত্বে যে বিশাল মুক্তিবাহিনীর দল গড়ে ওঠে, বাবা ছিলেন তাদের একজন। ক্যাপ্টেন শাজাহান ছিলেন দুর্ধর্ষ মুক্তিযোদ্ধা। বরিশালের বিভিন্ন জায়গায় ছিল তাঁর বাহিনীর তৎপরতা।

পাকিস্তানি হানাদার বাহিনীর ওপরে যখন তখন আক্রমণ চালিয়ে ক্যাপ্টেন শাজাহান ও তার গ্রুপ তাদের নাজেহাল করে তুলতেন। বাবা ছিলেন খুব নামকরা মুক্তিযোদ্ধা। তেমনি সাহসী। বাবা বয়সে বড় হলেও ক্যাপ্টেন শাজাহান বাবাকে অত্যন্ত স্নেহ করতেন।

একবার হলো কী, খালের ওপারে ক্যাম্প বসাল পাকিস্তানি মিলিটারি। তাদের সঙ্গে অনেক রাজাকার। রাজাকাররা তখন অবস্থা খারাপ বুঝে মিলিটারিদের সাথে সাথে ঘুরত। ভাবত বুঝি, অস্ত্রের সাথে সাথে থাকলে তারা নিরাপদে থাকবে।

যাই হোক, ক্যাপ্টেন শাজাহান স্থির করলেন রাতের বেলা খাল পেরিয়ে তাদের আক্রমণ করবেন। সেই হিসেবে আমার সাহসী বাবাকে আগের দিন রেকি করতে পাঠানো হলো। বাবার পরিবেশ জ্ঞান ছিল খুব তীক্ষ্ণ। সন্ধ্যা বেলা গোপনে খাল পার হয়ে বাবা ওপারে গিয়ে দেখলেন বিস্তীর্ণ মাঠ। বাবা জঙ্গলের ধার ঘেঁষে মাঠ পার হতে লাগলেন। আর সেই সময় ঘটল বিস্ফোরণ। মাঠের দুধারে ছিল মাইন পাতা, যা বাবা ঘুণাঙ্করেও টের পাননি। মাইনের ওপরে সরাসরি পা ফেলতেই বিস্ফোরণে বাবার দুটি পা-ই হাঁটুর নিচ থেকে উড়ে গেল।

বাবা জ্ঞান হারালেন।

বাবার পেছনে ছিলেন আর একজন মুক্তিযোদ্ধা। তিনি বাবাকে টেনে হেঁচড়ে নিয়ে গেলেন গহিন জঙ্গলের ভেতরে। সেখান থেকে পরে তাদের উদ্ধার করা হলো। বাবার মুক্তিযোদ্ধা জীবনের সেখানেই হলো ইতি।

এই ঘটনার পর বাবাকে সীমান্তের ক্যাম্প পাঠিয়ে দেয়া হলো। দীর্ঘদিন চিকিৎসা হলো বাবার। দুটো নকল পা তৈরি করে দেয়া হলো বাবাকে। কাঠের নকল পা।

হাতে লাঠি নিয়ে, কাঠের পা লাগিয়ে বাবা আমার নতুন করে হাঁটতে শিখলেন। আস্তে আস্তে এই কষ্ট সয়ে গেল বাবার। বাবা যখন মুক্তিযুদ্ধে, আমি তখন খুব ছোট। এক বছর হয়েছে কি-না সন্দেহ। তাই মুক্তিযুদ্ধ থেকে ফিরে এসে বাবা আমাকে কোলে তুলতে আমি ভঁাক করে কেঁদে সারা।

আর বাবাও আমাকে কোলে তুলে অপ্রস্তুত।

তারপর আস্তে আস্তে বাবার সাথে ভাব হলো। এখন আমার সবচেয়ে বড় বন্ধু, বাবা। আর বাবার বন্ধু, আমি। বাবাকে আমি খুব ভালোবাসি। তবু মনে হয় কোথায় যেন ফাঁক থেকে যায়।

আমাদের বাড়িতে শুধু আমি আর বাবা থাকি। সরকার কিছু অনুদান দেন। আর বাবা বাড়ি বসে বিভিন্ন প্রতিষ্ঠানের জন্যে কি সব রিপোর্ট তৈরি করেন। এই দিয়ে আমাদের সংসার চলে।

দাদা বাবার জন্যে ছোট একটা বাড়ি রেখে গেছেন। আমাদের তাই বাড়ি ভাড়া লাগে না।

আমার বয়স ষোল।

বাবার বয়স তেতাল্লিশ।

আমি এইবার মাধ্যমিক পরীক্ষা দিয়েছি।

পরীক্ষা মোটামুটি হয়েছে।

খুব একটা লেখাপড়া করতে আমার মন চায় না। বাবা মন খারাপ করবেন ভয়ে আমি পড়ি।

আমাদের বাড়িটা কী নির্জন। খাঁচায় একটা ময়না পাখি পুষেছি। বেশির ভাগ সময় আমি তার সঙ্গেই কথা বলি। তাকে ছোলা খেতে দিই। সে আমাকে, নয়ন, ও নয়ন বলে ডাকে।

আমার ডাক নাম নয়ন।

বাবা সারাটা সকাল বই পড়ার নিয়ে ঘাঁটাঘাঁটি করেন। বাসায় একটা কাজের বুয়া আছে। সে রান্নাবান্না করে। আমি আর বাবা খাই।

দুপুরে বাবা ঘুমোতে চলে গেলে, সারা বাড়িতে আমি একা। আমার এই-ই ভালো লাগে। বিকেলে আমার বন্ধু নিয়ামত আসে। আমরা বাড়ির সামনের মাঠে কোর্ট কেটে ব্যাডমিন্টন খেলি। সন্ধ্যার আগে আগে চলে যায়।

তারপর আমি বাড়ির মধ্যে ঢুকে দেখি বাবা আমার জন্যে চা নাস্তা সাজিয়ে বসে আছেন।

নাস্তা শেষ হলে আমি আর বাবা গল্প করি। কত গল্প, কত রকমের গল্প। যদিও সেগুলো সত্যি ঘটনা, তবু গল্পের সেরা। উনিশ শো একাত্তরে আমাদের দেশে যে অবিশ্বাস্য মুক্তিযুদ্ধ ঘটে গেছে তার বিভিন্ন ঘটনা নিয়ে গল্প করেন বাবা। বাবা বলেন সত্যিকার অর্থে নাকি এই দেশের শহরে-গ্রামে, ঘাটে-বাটে, খালে-বিলে, নদীতে-হাওড়ে, পাহাড়ে-জলাভূমিতে ঘটে গেছে মুক্তিযোদ্ধাদের হাজারো রকমের ‘অপারেশন’, যা নাকি ইতিহাস হয়ে আছে। আমার ইচ্ছে আমি আর একটু বড় হয়ে এই ইতিহাস পড়ব।

রাতের বেলা বাবা এক ঘরে ঘুমোন, আমি অন্য ঘরে। আগে বাবা আর আমি এক ঘরে ঘুমোতাম। মাধ্যমিক পরীক্ষার আগে আগে আমার ঘর আলাদা করে দিয়েছেন বাবা, যাতে আমি অনেক রাত জেগে লেখাপড়া করতে পারি।

সেই থেকে আমি পাশের ঘরে শুই।

বড়দের মতো আলাদা ঘরে শুতে আমার ভালো লাগে। আবার বাবার ঘরে শুয়ে শুয়ে গল্প করতেও ভালো লাগে।

কোনো কোনোদিন বাবাকে চিনতে পারি নি। চেনা বাবা হঠাৎ করে আচেনা হয়ে যান। এরকম হলে সেদিন আর আমার সাথে বেশি কথা টকা বলেন না বাবা। বই পড়েন না। রিপোর্ট লিখেন না। পাখির খাঁচার সামনে দাঁড়ান না। পাখিটাকে কথা বলা শেখান না। শুধু চুপচাপ জানালা দিয়ে একমনে তাকিয়ে থাকেন। সেদিন বাবার মন খারাপ হয়।

আমি সেদিন সারাদিন বাবার আশপাশ দিয়ে ঘুর ঘুর করি। বাবার জন্যে আমার মন কেমন যে করে। বাবাকে খুশি করার জন্যে কত রকমের ফন্দি আঁটি। কিন্তু কোনোটাই করা হয়ে ওঠে না। সেইদিনটাও ছিল যেন বাবার মন খারাপের দিন। সেদিন আবার আকশে চাঁদ উঠেছে খুব বড় হয়ে। পূর্ণিমা-তুর্ণিমা হবে। বাবা সারাদিন চুপ করে বসে ছিলেন।

রাতে আমি সাহস করে বাবার কাছে গিয়ে বললাম, বাবা, ছাদে যাবে?

বাবা আমার মুখের দিকে চুপ করে কিছুক্ষণ তাকিয়ে থেকে বললেন, কেন?



আমি ঢোক গিলে বললাম।

এই এমনি। আজ অ-নে-ক বড় চাঁদ উঠেছে তো। অনেক আলো আকাশে। কী ভেবে বাবা বললেন, চল।

এরপর বাবা অনেকক্ষণ ধরে বসে বসে তার নকল পা দুটো লাগালেন। কাঠের পা। হাতে লাঠি নিলেন। তারপর একটু একটু করে হেঁটে দোতলায় সিঁড়ি বেয়ে ছাদে উঠলেন। অনেকক্ষণ লাগল বাবার উঠতে। বাবার পেছন পেছন আমিও ছাদে উঠলাম।

ছাদের ওপর লম্বা লম্বা সিমেন্টের ঢালাই। একটা ঢালাইয়ের আবর্জনা পরিষ্কার করে আমি আর বাবা বসলাম।

আমাদের মাথার ওপরে চাঁদ তখন হাসছে। চাঁদের হাসি দেখে আমারও খুব হাসি পেল। আমি হেসে বাবাকে বললাম, সুন্দর আলো, তাই না বাবা?

বাবা বললেন, সুন্দর।

এরপর বাবা চারদিকে তাকিয়ে দেখতে লাগলেন।

আমাদের বাড়ির পাশে মন্টুদের বাড়ি। তার পাশে সত্যদের বাড়ি। তার পাশে মেরিনাদের বাড়ি। বাড়িগুলোর পরে লম্বা রাস্তা যতদূর চোখ যায় চলে গেছে। রাস্তার পাশেই খোলা মাঠ। রাতের বেলা একটু কুয়াশা জমে যেন সেটাকে তেপান্তরের মাঠ বলে মনে হচ্ছে। আমাদের বাড়ির সীমানার ভেতরে আম আর কাঁঠালের গাছ। গেটের পাশে সাদা ফুলে ভরা কামিনী গাছের ঝাড়। একটা কাঁঠবাদামের চারা ছাতর মতো ডানা মেলে আছে উঠোনে।

বাতাসে ফুলের মৃদু সুঘ্রাণ।

বাবা চারদিক ঘুরে ঘুরে দেখে বললেন, সুন্দর, আমাদের দেশটা সুন্দর।

আমি চুপ করে থাকলাম।

তখন বাবা হঠাৎ করে আমার দিকে মুখ ঘুরিয়ে বললেন, তোর খুব মন খারাপ করে, তাই না?

আমি বাবার কথা শুনে হক্চকিয়ে গিয়ে বললাম, কেন?

বাবা বললেন, আমাকে নিয়ে মানুষজনের সামনে তোর খুব লজ্জা হয়, না রে?

আমি বললাম, কেন?

বাবা বললেন, আমি যে তোকে কোথাও বেড়াতে নিতে পারি নে, হৈ চৈ করতে পারি নে, তোকে আনন্দ দিতে পারি নে, আমার যে পা নেই।

বাবার কথা শুনে আমি থ' হয়ে গেলাম। অনেকক্ষণ চুপ করে থেকে বললাম, একথা কেন বলছ বাবা?

বাবা আমার দিকে ফিরে কেমন করে যেন হেসে বললেন, তোর সব বন্ধুর বাবার পা আছে। তোর নিশ্চয় মানুষের কাছে বলতে খারাপ লাগে যে, তোর বাবা পজু। তার দুটি পা-ই নেই।

তুই যখন আরও বড় হবি, তুইও আমাকে ছেড়ে চলে যাবি। কিন্তু বিশ্বাস কর আমি কোনোদিনও কারো ঘাড়ে বোঝা হবো না।

বাবার কথা শুনে স্তম্ভিত হয়ে গেলাম আমি। আমার বয়স এখন ষোল। যখন আমি খুব ছোট্ট আমার বাবা মুক্তিযুদ্ধে যান, খুব বীরত্বের সঙ্গে যুদ্ধ করেন নয়টা মাস, দেশ স্বাধীন হবার মাত্র ক'সপ্তাহ আগে মাইন বিস্ফোরণে বাবা পা হারান। নিজেকে মুক্তিযোদ্ধা হিসেবে গণ্য করে অত্যন্ত গর্ভবোধ করেন আমার বাবা।

সেই বাবার মুখে এই কথা শুনে আমি হতভম্ব হয়ে গেলাম।

আস্তে আস্তে বোধ শক্তি ফিরে এল আমার।

আমি বাবার পাশে ঘেঁষে বসলাম। বাবার মুখের দিকে তাকালাম। তাকিয়ে থেকে বললাম, আমাদের মতো ছেলেদের পাগুলো ঠিক রাখতে গিয়ে তুমি মুক্তিযুদ্ধে নিজের পা হারিয়েছিলে বাবা। তুমি নিজের পা অক্ষত রাখতে চাইলে আজ এই দেশে আমাদের মতো ছেলেরা তাদের দুটো পা-ই হারাত। আমি তোমাকে ছেড়ে কোনোদিন যাব না বাবা। কক্ষনো না।

আমার কথা শুনে মনে হলো বাবার কাঠের পাদুটো কেমন যেন থর থর করে কেঁপে উঠল।

অবশ্য এটা আমার চোখের ভুলও হতে পারে। কাঠের পা কি কখনো অবেগে কেঁপে উঠতে পারে?

### লেখক পরিচিতি

আনোয়ারা সৈয়দ হক ১৯৪০ খ্রিস্টাব্দের ৫ই নভেম্বর যশোর জেলায় জন্মগ্রহণ করেন। তিনি ১৯৬৫ সালে ঢাকা মেডিকেল কলেজ থেকে এমবিবিএস পাশ করেন। তিনি পেশায় চিকিৎসক। মনোরোগ বিশেষজ্ঞ ও অধ্যাপক। তিনি বাংলাদেশের একজন বিশিষ্ট শিশু-সাহিত্যিক। তাঁর প্রকাশিত উল্লেখযোগ্য গ্রন্থঃ ছানার নানা বাড়ি (১৯৭৭), বাবার সঙ্গে ছানা (১৯৮৬), ছানা ও মুক্তিযুদ্ধ (১৯৮৭) প্রভৃতি। তিনি ব্যাংক সাহিত্য পুরস্কার, অনন্যা সাহিত্য পুরস্কার এবং কবীর চৌধুরী শিশু সাহিত্য পুরস্কার লাভ করেন।

### পাঠ পরিচিতি

বাংলাদেশের মহান মুক্তিযুদ্ধের পটভূমিতে রচিত গল্প। ১৯৭১ সালে বাংলাদেশের স্বাধীনতা সংগ্রামে এ দেশের মানুষ মরণপণ লড়াই করে বিজয়ী হয়। এই যুদ্ধে দেশের লক্ষ লক্ষ মানুষ জীবন দান করেন। অসংখ্য মুক্তিযোদ্ধা যুদ্ধাহত হয়ে স্বাধীন দেশে জীবনযাপন করে।

এই গল্পের নায়ক একজন বীর মুক্তিযোদ্ধা। যুদ্ধের শেষ দিকে একটি অপারেশনের আগে রেকি করতে গেলে মাইন বিস্ফোরণে তাঁর দুই পা হাঁটুর নিচে থেকে উড়ে যায়।

চিকিৎসা করানোর পরে তিনি ধীরে ধীরে সুস্থ হয়ে ওঠেন। তাঁকে দুটো নকল পা লাগিয়ে দেয়া হয়। একদিন যুদ্ধ শেষ হয়। স্বাধীন দেশে ফিরে আসেন তিনি। একমাত্র ছেলেকে নিয়ে শুরু করেন নতুন জীবন।

ছেলের যখন ষোল বছর বয়স তখন একদিন তাঁর মনে হয় বড় হয়ে ছেলেটি ওর পঞ্জু বাবাকে ছেড়ে চলে যাবে নাতো? মুক্তিযোদ্ধার ভীষণ মন খারাপ হয়।

একদিন ছেলেকে এই কথা জিজ্ঞেস করতেই ছেলেটি হতভম্ব হয়ে যায়। ও বাবার পাশে বসে বলে, বাবা তুমিতো আমাদের মতো ছেলেদের পা ঠিক রাখতে মুক্তিযুদ্ধে নিজের পা হারিয়েছিলে। তুমি তোমার পা অক্ষত রাখতে চাইলে আমাদের মতো ছেলেরা তাদের পা হারাতো বাবা। আমি তোমাকে ছেড়ে কোনদিন কোথাও যাবো না।

ছেলের কথা শুনে মুক্তিযোদ্ধা গভীর অবেগে কেঁপে উঠে। তার মনে হয় তাঁর কাঠের পাজোড়া বুঝি কেঁপে উঠল।

### শব্দার্থ ও টীকা

নয় নম্বর সেপ্টর	- ১৯৭১-এ মুক্তিযুদ্ধ পরিচালনার জন্যে বাংলাদেশকে ১১টি সামরিক অঞ্চল বা সেপ্টরে ভাগ করা হয়। খুলনা-সুন্দরবন অঞ্চলকে নিয়ে গঠিত হয়েছিল ৯ নম্বর সেপ্টর।
ক্যাপ্টেন	- সামরিক কর্মকর্তার পদ মর্যাদা বিশেষ।
রাজাকার	- স্বেচ্ছাসেবক। মুক্তিযুদ্ধকালে পাকিস্তানি হানাদার বাহিনীর সহায়ক বিশেষ বাহিনী। এই বাঙালিরা বাংলাদেশের স্বাধীনতা সংগ্রামের বিরোধিতা করে।
রেকি	- শত্রুর বিরুদ্ধে আক্রমণের পূর্বে আক্রমণ-এলাকা সংক্রান্ত খোঁজখবর নেওয়া।
বিস্তীর্ণ	- ব্যাপক। বহুদূর বিস্তৃত।
মাইন	- এক ধরনের প্রতিরক্ষামূলক যুদ্ধাস্ত্র।
গহিন	- গভীর। দুর্গম।
অপ্রস্তুত	- বিব্রত। ভেবে উঠতে না পারা প্রস্তুত বা তৈরি হয়নি এমন।
অনুদান	- সাহায্য হিসেবে অর্থ বরাদ্দ।
অপারেশন	- শত্রুর বিরুদ্ধে সামরিক অভিযান বা আক্রমণ।
রিপোর্ট	- প্রতিবেদন। কোনো বিষয়ে তথ্য ও বিবরণ প্রদান।
স্তম্ভিত	- বিস্ময়ে স্তম্ভ হয়েছিল এমন।

- হতভম্ব - হতবাক হয়ে যাওয়া। স্তম্ভিত।  
 অক্ষত - আঘাতহীন। কোথাও আঘাত লাগেনি এমন।

## অনুশীলনী

### বহুনির্বাচনি প্রশ্ন

- কার নেতৃত্বে নয় নম্বর সেক্টরে বিশাল মুক্তি বাহিনীর দল গড়ে ওঠে  
 ক. ক্যাপ্টেন সিতারা বেগমের  
 খ. ক্যাপ্টেন শাজাহানের  
 গ. ক্যাপ্টেন হালিমের  
 ঘ. ক্যাপ্টেন জামিলের
- নয়নের বাবার মুক্তিযোদ্ধা জীবনের ইতি হওয়ার কারণ-  
 ক. দুটো পা হারানোর জন্য  
 খ. দুটো নকল পা হওয়ার জন্য  
 গ. কাঠের পা হওয়ার জন্য  
 ঘ. যুদ্ধ শেষ হওয়ার জন্য

### নিচের অনুচ্ছেদটি পড়ে ৩ ও ৪ নং প্রশ্নের উত্তর দাও।

ক্র্যাচে ভর দিয়ে ধীরে ধীরে মুক্তিযোদ্ধা আরমান আলী এসে দাঁড়ায় ছেলের চায়ের দোকানে। ছেলে দুটো বিস্কুট আর এক কাপ চা দেয়। আরমান আলী চা খায় আর ভাবে এমন জীবন থাকার চেয়ে না থাকাই ভালো যাকে এক চায়ের জন্য নির্ভর করতে হয় ছেলের আয়ের ওপর।

- কাঠের পা গল্পের যে দিক মুক্তিযোদ্ধা আরমান আলীর জীবনে দেখতে পাওয়া যায়, তা হল-  
 i. একজন মুক্তিযোদ্ধার জীবনের অসহায়ত্ব  
 ii. একজন মুক্তিযোদ্ধার জীবনের পরনির্ভরশীলতা  
 iii. একজন মুক্তিযোদ্ধার জীবনের ইতিহাস

### নিচের কোনটি সঠিক?

- ক. i ও ii  
 খ. i ও iii  
 গ. ii ও iii  
 ঘ. i, ii ও iii
- নিম্নের যে বৈশিষ্ট্যের জন্য আরমান আলী আর নয়নের বাবাকে এক সূত্রে বাঁধা যায় তা হল, এরা দুজনই-  
 ক. তিরস্কৃত মুক্তিযোদ্ধা  
 খ. নির্যাতিত মুক্তিযোদ্ধা  
 গ. নিগৃহিত মুক্তিযোদ্ধা  
 ঘ. হতাশাগ্রস্ত মুক্তিযোদ্ধা

### সৃজনশীল প্রশ্ন

১. কাজল জন্মের পর থেকে দেখছে তার দাদা রহমান সাহেব হুইল চেয়ারে বসেই চলাফেরা করেন। বাথরুমে নিতে তার দাদী অনেক কষ্ট স্বীকার করে। এটা দেখে কাজলের খুব মায়্যা হয়। দাদী কাজলকে বলেছিল মুক্তিযুদ্ধের সময় পাকিস্তানী হানাদার বাহিনী তোমার দাদাকে এমনভাবে মেরেছিল যে তিনি জীবনের জন্য পঙ্গু হয়ে যান। তার অপরাধ ছিল একটাই যে তিনি তখন বিশ্ববিদ্যালয়ের ছাত্র। কাজল দাদাকে প্রশ্ন করে তোমার এই অবস্থার জন্য তোমার মনে কি কোন প্রতিক্রিয়া হয়? উত্তরে দাদা বলেন- আমার মতো এ রকম হাজার পঙ্গু মুক্তিযোদ্ধার পায়ের ওপর ভর করেই তো দাঁড়িয়ে আছে আমাদের এই স্বাধীন বাংলাদেশ।

- ক. খালের ওপারে ক্যাম্প বসিয়েছিল কারা? ১
- খ. ‘কাঠের পা’ গল্পের নয়নের বাবাকে কাঠের পা বানিয়ে দেওয়া হয়েছিল কেন? ২
- গ. ‘কাঠের পা’ গল্পের কোন বিষয়টি কাজলের দাদার জীবনের প্রতিফলিত হয়েছে তা ব্যাখ্যা কর। ৩
- ঘ. ‘আমার মতো এ রকম হাজার পঙ্গু মুক্তিযোদ্ধার পায়ের ওপর ভর করেই তো দাঁড়িয়ে আছে আমাদের স্বাধীন বাংলাদেশ। কাজলের দাদার এ মন্তব্যটির তাৎপর্য ‘কাঠের পা’ গল্পের আলোকে ব্যাখ্যা কর। ৪

# চিন্তাশীল

রবীন্দ্রনাথ ঠাকুর



## প্রথম দৃশ্য

চিন্তাশীল নরহরি চিন্তায় নিমগ্ন। ভাত শুকাইতেছে  
মা মাছি তাড়াইতেছেন

মা। অত ভেবো না, মাথার ব্যামো হবে বাছা!  
নরহরি। আচ্ছা মা, ‘বাছা’ শব্দের খাতু কী বলো দেখি।  
মা। কী জানি বাপু!

নরহরি। ‘বৎস’। আজ তুমি বলছ ‘বাছা’—দু হাজার বৎসর আগে বলত ‘বৎস’—এই কথাটা একবার ভালো করে  
ভেবে দেখো দেখি মা! কথাটা বড়ো সামান্য নয়। এ কথা যতই ভাববে ততই ভাবনার শেষ হবে না।

পুনরায় চিন্তায় মগ্ন

মা। যে ভাবনা শেষ হয় না এমন ভাবনার দরকার কী বাপ! ভাবনা তো তোর চিরকাল থাকবে, ভাত যে  
শুকোয়। লক্ষ্মী আমার, একবার ওহ্।

নরহরি। (চমকিয়া) কী বললে মা? লক্ষ্মী? কী আশ্চর্য! এক কালে লক্ষ্মী বলতে দেবী-বিশেষকে বোঝাত। পরে লক্ষ্মীর গুণ অনুসারে সুশীলা স্ত্রীলোককে লক্ষ্মী বলত, কালক্রমে দেখে পুরুষের প্রতিও লক্ষ্মী শব্দের প্রয়োগ হচ্ছে! একবার ভেবে দেখো মা, আস্তে আস্তে ভাষার কেমন পরিবর্তন হয়! ভাবলে আশ্চর্য হতে হবে।

ভাবনার দ্বিতীয় ডুব

মা। আমার আর কি কোনো ভাবনা নেই নরু? আচ্ছা, তুই তো এত ভাবিস, তুইই বল দেখি, উপস্থিত কাজ উপস্থিত ভাবনা ছেড়ে কি এই-সব বাজে ভাবনা নিয়ে থাকা ভালো? সকল ভাবনারই তো সময় আছে।

নরহরি। এ কথাটা বড়ো গুরুতর মা! আমি হঠাৎ এর উত্তর দিতে পারব না। এটা কিছুদিন ভাবতে হবে— ভেবে পরে বলব।

মা। আমি যে কথাই বলি তোর ভাবনা তাতে কেবল বেড়েই ওঠে, কিছুতেই আর কমে না। কাজ নেই বাপু, আমি আর-কাউকে পাঠিয়ে দিই।

[প্রস্থান]

মাসিমা

মাসিমা। ছি নরু, তুই কি পাগল হলি? ছেঁড়া চাদর, একমুখ দাড়ি। সমুখে ভাত নিয়ে ভাবনা! সুবলের মা তোকে দেখে হেসেই কুবুক্ষেত্র!

নরহরি। কুবুক্ষেত্র! আমাদের আর্যগৌরবের শ্রাশানক্ষেত্র! মনে পড়লে কি শরীর রোমাঞ্চিত হয় না? অন্তঃকরণ অধীর হয়ে ওঠে না? আহা, কত কথা মনে পড়ে! কত ভাবনাই জেগে ওঠে! বল কী মাসি! হেসেই কুবুক্ষেত্র! তার চেয়ে বলো-না কেন কেঁদেই কুবুক্ষেত্র?

অশ্রুনিপাত

মাসিমা। ওমা, এ যে কাঁদতে বসল! আমাদের কথা শুনলেই এর শোক উপস্থিত হয়। কাজ নেই বাপু!

[প্রস্থান]

দিদিমা

দিদিমা। ও নরু, সূর্য যে অস্ত যায়।

নরহরি। ছি দিদিমা, সূর্য তো অস্ত যায় না। পৃথিবীই উল্টে যায়। রোসো, আমি তোমাকে বুঝিয়ে দিচ্ছি।

চারদিকে চাহিয়া

একটা গোল জিনিস কোথাও নেই?

দিদিমা। এই তোমার মাথা আছে— মুড়ু আছে।

নরহরি। কিন্তু মাথা যে বন্দু, মাথা যে ঘোরে না।

দিদিমা। তোমারই ঘোরে না, তোমার রকম দেখে পাড়াসুন্দ লোকের মাথা ঘুরছে! নাও, আর তোমায় বোঝাতে হবে না, এ দিকে ভাত জুড়িয়ে গেল, মাছি ভন্ ভন্ করছে।

নরহরি। ছি দিদিমা, এটা যে তুমি উল্টো কথা বললে; মাছি তো ভন্ ভন্ করে না। মাছির ডানা থেকেই এইরকম শব্দ হয়। রোসো, আমি তোমাকে প্রমাণ করে দিচ্ছি—

দিদিমা। কাজ নেই তোমার প্রমাণ করে।

## দ্বিতীয় দৃশ্য

নরহরির চিন্তামগ্ন ভাবনা ভাঙাইবার উদ্দেশ্যে  
নরহরির শিশু ভাগিনেয়কে কোলে করিয়া মাতার প্রবেশ

মা। (শিশুর প্রতি) জাদু, তোমার মামাকে দণ্ডবৎ করো।

নরহরি। ছি মা, ওকে ভুল শিখিয়ে না। একটু ভেবে দেখলেই বুঝতে পারবে, ব্যাকরণ অনুসারে দণ্ডবৎ করা হতেই পারে না— দণ্ডবৎ হওয়া বলে। কেন বুঝতে পেরেছ মা? কেননা দণ্ডবৎ মানে—

মা। না বাবা, আমাকে পরে বুঝিয়ে দিলেই হবে। তোমার ভাগ্নেকে এখন একটু আদর করো।

নরহরি। আদর করব! আচ্ছা এসো, আদর করি।

শিশুকে কোলে লইয়া

কী করে আদর আরম্ভ করি? রোসো, একটু ভাবি।

চিন্তামগ্ন

মা। আদর করবি, তাতেও ভাবতে হবে নবু?

নরহরি। ভাবতে হবে না মা? বল কী? ছেলেবেলাকার আদরের উপরে ছেলের সমস্ত ভবিষ্যৎ নির্ভর করে তা কি জান? ছেলেবেলাকার এক-একটা সামান্য ঘটনার ছায়া বৃহৎ আকার ধরে আমাদের সমস্ত যৌবনকালকে, আমাদের সমস্ত জীবনকে আচ্ছন্ন করে রাখে, এটা যখন ভেবে দেখা যায় তখন কি ছেলেকে আদর করা একটা সামান্য কাজ বলে মনে করা যায়? এইটে একবার ভেবে দেখো দিখি মা!

মা। থাক বাবা, সে কথা আর-একটু পরে ভাবব, এখন তোমার ভাগ্নেটির সঙ্গে দুটো কথা কও দেখি।

নরহরি। ওদের সঙ্গে এমন কথা কওয়া উচিত যাতে ওদের আমোদ ও শিক্ষা দুই হয়। আচ্ছা হরিদাস, তোমার নামের সমাস কী বলো দেখি?

হরিদাস। আমি চমা কাব।

মা। দেখো দেখি বাছা, ওকে এ-সব কথা জিগেস কর কেন? ও কী জানে!

নরহরি। না, ওকে এই বেলা থেকে এইরকম করে অল্পে অল্পে মুখস্থ করিয়ে দেব।

মা। (ছেলে তুলিয়া লইয়া) না বাবা, কাজ নেই তোমার আদর করে।

নরহরি মাথায় হাত দিয়া পুনশ্চ চিন্তায় মগ্ন

মা। (কাতর হইয়া) বাবা, আমায় কাশী পাঠিয়ে দে, আমি কাশীবাসী হব।

নরহরি। তা যাও-না মা! তোমার ইচ্ছে হয়েছে, আমি বাধা দেব না।

মা। (স্বগত) নবু আমার সকল কথাতেই ভেবে অস্থির হয়ে পড়ে, এটাতে বড়ো বেশি ভাবতে হল না।

(প্রকাশ্যে)তা হলে তো আমাকে মাসে মাসে কিছু টাকার বন্দোবস্ত করে দিতে হবে।

নরহরি। সত্যি নাকি? তা হলে আমাকে আর কিছু দিন ধরে ভাবতে হয়। এ কথা নিতান্ত সহজ নয়। আমি এক হপ্তা ভেবে পরে বলব।

মা। (ব্যস্ত হইয়া) না বাবা, তোমার আর ভাবতে হবে না— আমার কাশী গিয়ে কাজ নেই।

### লেখক-পরিচিতি

বিশ্বকবি রবীন্দ্রনাথ ঠাকুর বাংলা ২৫শে বৈশাখ ইংরেজি ৭ই মে, ১৮৬১ সালে কলকাতার জোড়াসাঁকোর বিখ্যাত ঠাকুর পরিবারে জন্মগ্রহণ করেন। পিতা মহর্ষি দেবেন্দ্রনাথ ঠাকুর। অল্প বয়সে রবীন্দ্রনাথের মধ্যে কবিপ্রতিভার উন্মেষ ঘটে ও ধীরে ধীরে বিকশিত হয়। ১৯১৩ সালে তিনি তাঁর ‘গীতাঞ্জলি’ কাব্যগ্রন্থের ইংরেজি অনুবাদের জন্য পৃথিবীর সর্বশ্রেষ্ঠ সাহিত্য পুরস্কার ‘নোবেল প্রাইজ’ লাভ করেন। এশীয়দের মধ্যে তিনিই সর্বপ্রথম এ পুরস্কার লাভ করেন। একমাত্র মহাকাব্য ছাড়া তিনি সাহিত্যের সব শাখাতেই বিচরণ করেছেন। ৭ই আগস্ট ১৯৪১ সালে কলকাতায় তিনি মৃত্যুবরণ করেন।

### সারসংক্ষেপ

এই চিন্তাধর্মী নাটিকাটি রবীন্দ্রনাথ ঠাকুরের একটি হাস্যরসাত্মক রচনা। কথায় আছে – “ভাবিয়া করিও কাজ” কিন্তু বেশি বেশি কোনো কিছুই ভালো নয়। তেমনি বেশি ভাবাও মজ্জালজনক নয়। নরহরি সব সময় চিন্তায় মগ্ন থাকে, সে জন্য লেখক তাকে চিন্তাশীল বলেছেন। বেশি চিন্তা করার ফলে সে বাস্তব জগত থেকে দূরে সরে আছে, সাথে সাথে তার আশপাশের মানুষদেরকেও বিব্রত করছে। নরহরির মতো যারা অकारণে সব বিষয় নিয়ে চিন্তা করে করে সময় নষ্ট করে, তাদের দিয়ে বাস্তবে কোনো কাজই হয় না। তবে কোনো সময়ই কোনো কিছু নিয়ে চিন্তা করব না, এমনটাও ঠিক নয়।

**শব্দার্থ ও টীকা :** চিন্তাশীল—চিন্তাপরায়ণ, চিন্তা দ্বারা বিচার করতে সমর্থ। বৎস—বাছা, স্নেহসম্বোধনে। বাচ্চা, শাবক, বাছুর। উপস্থিত—বর্তমান, বিদ্যমান, হাজির, নিকটস্থ, সম্মুখবর্তী। কুরুক্ষেত্র—কুরু-পাণ্ডবের যুদ্ধক্ষেত্র (মহাভারতে বর্ণিত) (কুরু-চন্দ্রবংশীয় রাজাবিশেষ, কৌরব)। রোমাঞ্চিত—(রোমাঞ্চিত) অতিরিক্ত আনন্দ, পুলক, ভয়, বিস্ময়ের কারণে গায়ের লোম খাড়া হওয়া, গায়ে কাঁটা দেওয়া। অন্তঃকরণ—মন, হৃদয়। অধীর—চঞ্চল, অস্থির, কাতর, ব্যাকুল, অসহিষ্ণু। দণ্ডবৎ—(মূল অর্থ দণ্ডের তুল্য) প্রণাম করার জন্য মাটিতে লুটিয়ে পড়া। রোসো—সবুর কর। আচ্ছন্ন—আবৃত, ঢাকা, ব্যাপ্ত, অচেতন্য, অভিভূত। পুনঃ—আবারও, পুনরপি (লেখা শেষ করে আবার কিছু লিখতে হলে পুনঃ দিয়ে আরম্ভ করতে হয়)। কাশী—হিন্দুধর্মাবলম্বীদের তীর্থস্থান, বারানসী, বেনারস। কাশীবাসী—কাশীধামে তীর্থবাসকারী। স্বগত—আত্মগত, মনে মনে, যা কোনো ব্যক্তিকে উদ্দেশ্য না করে আপন মনে বলা হয়। শ্মশান—যেখানে মৃত ব্যক্তিকে পোড়ানো হয়, শবদাহস্থান।

## অনুশীলনী

### বহুনির্বাচনি প্রশ্ন

১. কাশী কোন ধর্মাবলম্বীদের তীর্থস্থান ?  
 ক. হিন্দুদের  
 খ. বৌদ্ধদের  
 গ. খ্রিস্টানদের  
 ঘ. মুসলমানদের
২. ‘চিন্তাশীল’ নাটকে লক্ষ্মী শব্দটির প্রয়োগ হয়েছে কার প্রতি ?  
 ক. দেবীর প্রতি  
 খ. লোকের প্রতি  
 গ. ছেলের প্রতি  
 ঘ. মায়ের প্রতি
৩. ‘আমি এক হস্তা ভেবে পরে বলব’। এ উক্তিটিতে ‘হস্তা’ শব্দটি কোন ধরনের ভাবার শব্দ  
 ক. সাধু  
 খ. চলিত  
 গ. আঞ্চলিক  
 ঘ. সাধু ও চলিতের মিশ্রণ
৪. আদিতে ‘লক্ষ্মী’ শব্দটি কাদের উদ্দেশ্যে ব্যবহৃত হত ?  
 ক. দেবীদের  
 খ. মেয়েদের  
 গ. পুরুষদের  
 ঘ. ছেলে-মেয়েদের

### সৃজনশীল প্রশ্ন

চিন্তাশীল একটি শিশুতোষ নাটক। এই নাটকের নরহরি সবসময় চিন্তামগ্ন থাকে। তাই লেখক তাকে চিন্তাশীল বলেছেন। বেশি চিন্তার কারণে সে বাস্তব জগৎ থেকে দূরে সরে আছে। সে কারণে তার আশপাশের মানুষদেরও বিব্রত করছে। নরহরির মতো যারা অকারণে সব বিষয় নিয়ে চিন্তা করে সময় নষ্ট করে তাদের দিয়ে বাস্তবে কোনো কাজ হয় না। তবে প্রয়োজনবোধে চিন্তা করা দরকার।

- ক. ‘চিন্তাশীল’ কোন ধরনের রচনা?
- খ. প্রয়োজনবোধে চিন্তা করা দরকার ব্যাখ্যা কর।
- গ. চিন্তাশীলদের জীবনে কী সমস্যা হয় -ব্যাখ্যা কর।
- ঘ. জীবন থেকে তুমি কী শিক্ষা পাও- আলোচনা কর।



# অবাক জলপান

সুকুমার রায়



[ছাতা মাথায় এক পথিকের প্রবেশ, পিঠে লাঠির আগায় লোটা-বাঁধা পুঁটলি, উষ্মখুষ্ক চুল, শ্রান্ত চেহারা]

পথিক। নাঃ একটু জল না পেলে আর চলছে না। সেই সকাল থেকে হেঁটে আসছি, এখনও প্রায় এক ঘণ্টার পথ বাকি। তেষ্টায় মগজের ঘিলু শুকিয়ে উঠল। কিন্তু জল চাই কার কাছে? গেরস্তের বাড়ি দুপুর রোদে দরজা এঁটে সব ঘুম দিচ্ছে, ডাকলে সাড়া দেয় না। বেশি চেষ্টাতে গেলে হয়তো লোকজন নিয়ে তেড়ে আসবে। পথেও ত লোকজন দেখছি। ঐ একজন আসছে! ওকেই জিজ্ঞেস করা যাক।

[ঝুড়ি মাথায় এক ব্যক্তির প্রবেশ]

পথিক। মশাই, একটু জল পাই কোথায় বলতে পারেন?

ঝুড়িওয়ালা। জলপাই? জলপাই এখন কোথায় পাবেন? এ ত জলপাইয়ের সময় নয়। কাঁচা আম চান দিতে পারি—

পথিক। না না, আমি তা বলিনি—

ঝুড়িওয়ালা। না কাঁচা আম আপনি বলেননি, কিন্তু জলপাই চাচ্ছিলেন কিনা, তা ত আর এখন পাওয়া যাবে না, তাই বলছিলুম—

পথিক। না হে, আমি জলপাই চাচ্চিনে—

ঝুড়িওয়ালা। চাচ্ছেন না তো, ‘কোথায় পাব’ কচ্ছেন কেন? খামকা এরকম করবার মানে কী?

পথিক। আপনি ভুল বুঝেছেন—আমি জল চাচ্ছিলাম—

ঝুড়িওয়ালা জল চাচ্ছেন তো ‘জল’ বললেই হয়— ‘জলপাই’ বলবার দরকার কী?

জল আর জলপাই কি এক হল? আলু আর আলুবোখারা কি সমান? মাছও যা আর মাছরাঙাও তাই? বরকে কি আপনি বরকন্দাজ বলেন? চাল কিনতে গেলে কি চালতার খোঁজ করেন?

পথিক। ঘাট হয়েছে মশাই। আপনার সঙ্গে কথা বলাই আমার অন্যায় হয়েছে।

ঝুড়িওয়ালা। অন্যায় তো হয়েছেই। দেখছেন ঝুড়ি নিয়ে যাচ্ছি—তবে জলই-বা চাচ্ছেন কেন? ঝুড়িতে করে কি জল নেয়? লোকের সঙ্গে কথা কইতে গেলে একটু বিবেচনা করে বলতে হয়।

[প্রস্থান]

পথিক। দেখলে! কী কথায় কী বানিয়ে ফেললে! যাক, ঐ বুড়ো আসছে, ওকে একবার বলে দেখি।

[লাঠিহাতে, চটি পায়ে, চাদর গায়ে এক বৃন্দ্র প্রবেশ]

বৃন্দ্র। কে ও? গোপ্লা নাকি?

পথিক। আজ্ঞে না, আমি পুৰগাঁয়ের লোক—একটু জলের খোঁজ কচ্ছিলুম—

বৃন্দ্র। বল কিহে? পুৰগাঁও ছেড়ে এখানে এয়েছ জলের খোঁজ করতে? —হাঃ, হাঃ, হাঃ। তা, যাই বল বাপু, অমন জল কিন্তু কোথাও পাবে না। খাসা জল, তোফা জল, চমৎকা-৷-র জল।

পথিক। আজ্ঞে হা, সেই সকাল থেকে হাঁটতে হাঁটতে বেজায় তেষ্টা পেয়ে গেছে।

বৃন্দ্র। তা ত পাবেই। ভালো জল যদি হয়, তা দেখলে তেষ্টা পায়, নাম করলে তেষ্টা পায়, ভাবতে গেলে তেষ্টা পায়। তেমন জল ত খাওনি কখনো! —বলি ঘুমুড়ির জল খেয়েছ কোনোদিন?

পথিক। আজ্ঞে না, তা খাইনি—

বৃন্দ্র। খাওনি? অ্যাঃ! ঘুমুড়ি হচেছ আমার মামাবাড়ি—আদত জলের জায়গা। সেখানকার যে জল, সে কী বলব তোমায়? কত জল খেলাম-কলের জল, নদীর জল, ঝরনার জল, পুকুরের জল—কিন্তু মামাবাড়ির কুয়ার যে জল, অমনটি আর কোথাও খেলাম না। ঠিক যেন চিনির পানি, ঠিক যেন ক্যাণ্ডা-দেওয়া সরবৎ!

পথিক। তা মশাই আপনার জল আপনি মাথায় করে রাখুন—আপাতত এখন তেষ্টার সময়, যা হয় একটু জল আমার গলায় পড়লেই চলবে—

বৃন্দ। তাহলে বাপু তোমার গাঁয়ে বসে জল খেলেই ত পারতে? পাঁচ ক্রোশ পথ হেঁটে জল খেতে আসবার দরকার কি ছিল? যা হয় একটা হলেই হল ও আবার কী রকম কথা? আর অমন তাচ্ছিল্য করে বলবারই-বা দরকার কি? আমাদের জল পছন্দ না হয়, খেও না-বাস্। গায়ে পড়ে নিন্দে করবার দরকার কি? আমি ওরকম ভালোবাসিনে। হ্যাঁঃ-[রাগে গজগজ করিতে করিতে বৃন্দের প্রস্থান]

[পাশের এক বাড়ির জানলা খুলিয়া আর এক বৃন্দের হাসিমুখ বাহিরকরণ]

বৃন্দ। কী হে? এত তর্কাতর্কি কিসের?

পথিক। আজে না, তর্ক নয়। আমি জল চাইছিলুম তা উনি সে কথা কানেই নেন না—কেবলই সাত পাঁচ গপ্প করতে লেগেছেন। তাই বলতে গেলুম তো রেগে মেগে অস্থির!

বৃন্দ। আরে দূর দূর! তুমিও যেমন! জিজ্ঞেস করবার আর লোক পাওনি? ও হতভাগা জানেই বা কী, আর বলবেই বা কী? ওর যে দাদা আছে, খালিপুর্বে চাকরি করে, সেটা তো একটা আস্ত গাধা! ও মুখ্যাটা কী বললে তোমায়?

পথিক! কী জানি মশাই—জলের কথা বলতেই কুয়োর জল, নদীর জল, পুকুরের জল, কলের জল, মামাবাড়ির জল, বলে পাঁচ রকম ফর্দ শুনিয়ে দিলে—

বৃন্দ। হুঃ—ভাবলে খুব বাহাদুরি করেছি। তোমায় বোকা মতন দেখে খুব চাল চেলে নিয়েছে। ভারি ত ফর্দ করছেন! আমি লিখে দিতে পারি, ও যদি পাঁচটা জল বলে থাকে তা আমি এক্ষুণি পঁচিশটা বলে দেব—

পথিক। আজে হ্যাঁ। কিন্তু আমি বলছিলুম কি একটু খাবার জল—

বৃন্দ। কী বলছ? বিশ্বাস হচ্ছে না? আচ্ছা শুনে যাও। বিষ্টির জল, ডাবের জল, নাকের জল, চোখের জল, জিভের জল, হুঁকোর জল, ফটিক জল, রোদে ঘেমে জ-ল, আহ্লাদে গলে জ-ল, গায়ের রক্ত জ-ল, বুঝিয়ে দিল যেন জ-ল—কটা হয়? গোনোনি বুঝি?

পথিক। না মশাই, গুনিনি—আমার আর খেয়ে দেয়ে কাজ নেই—

বৃন্দ। তোমার কাজ না থাকলেও আমাদের কাজ থাকতে পারে ত? যাও, যাও, মেলা বকিও না।— একেবারে অপদার্থের এক শেষ! [সশব্দে জানলা বন্ধ]

পথিক। নাঃ, আর জলটল চেয়ে কাজ নেই—এগিয়ে যাই, দেখি কোথাও পুকুরটুকুর পাই কিনা।

[লম্বা লম্বা চুল, চোখে সোনার চশমা, হাতে খাতা পেন্সিল, পায়ে কটকী জুতা, একটি ছোকরার প্রবেশ]

লোকটা নেহাত এসে পড়েছে যখন, একটু জিজ্ঞাসাই করে দেখি। মশাই আমি অনেক দূর থেকে আসছি, এখানে একটু জল মিলবে না কোথাও?

ছোকরা। কী বলছেন? ‘জল’ মিলবে না? খুব মিলবে। একশোবার মিলবে! দাঁড়ান এক্ষুণি মিলিয়ে দিচ্ছি।— জল চল তল বল কল ফল— মিলের অভাব কি? কাজল সজল-উজ্জ্বল-জ্বলজ্বল-চঞ্চল চল চল, আখিজল হল হল, নদীজল কল কল, হাসি শূনি খল খল, অঁকনল বাঁকানল, আগল ছাগল পাগল— কত চান।

পথিক। এ দেখি আরেক পাগল! মশাই, আমি সে রকম মিলবার কথা বলিনি।

হোকরা। তবে কোন রকম মিল চাচ্ছেন বলুন? কী রকম, কোন ছন্দ, সব বলে দিন—যেমনটি চাইবেন তেমনটি করে মিলিয়ে দেব।

পথিক। ভালো বিপদেই পড়া গেল দেখছি—(জোরে) মশাই! আর কিছু চাইনে—(আরো জোরে) শুধু—একটু জল—খেতে চাই। হোকরা—ও বুঝেছি। শুধু একটু জল খেতে চাই। এইত? আচ্ছা বেশ। এ আর মিলবে না কেন? ভারি তেষ্টাপ্রাণ আই—চাই কিন্তু কোথা গেলে পাই—বল্ শীঘ্র বল্ নারে ভাই। কেমন? ঠিক মিলছে ত?

পথিক। আজ্ঞে হ্যাঁ, খুব মিলছে—খাসা মিলছে—নমস্কার। (সরিয়া গিয়া) নাঃ বকে বকে মাথা ধরিয়ে দিলে—একটু ছায়ায় বসে মাথাটা ঠান্ডা করে নি।

[একটা বাড়ির ছায়ায় গিয়া বসিল]

হোকরা। (খুশি হইয়া লিখিতে লিখিতে) মিলবে না? বলি, মেলাচ্ছে কে? সেবার যখন বিষ্ণুদাদা 'বৈকাল' কিসের সঙ্গে মিল দেবে খুঁজে পাচ্ছিল না, তখন 'নৈপাল' বলে দিয়েছিল কে? নৈপাল কাকে বলে জানেন ত? নেপালের লোক হল নৈপাল। (পথিককে না দেখিয়া) লোকটা গেল কোথায়? দুত্তোরি! [প্রস্থান]

[বাড়ির ভিতরে বালকের পাঠ— পৃথিবীর তিন ভাগ জল এক ভাগ স্থল। সমুদ্রের জল লবণাক্ত।]

পথিক। ওহে খোকা! একটু এদিকে শুনো যাও ত?

[বুদ্ধমূর্তি, মাথায় টাক, লম্বা দাড়ি খোকার মামা বাড়ি হইতে বাহির হইলেন]

মামা। কে হে? পড়ার সময় ডাকাডাকি করতে এয়েছ?— (পথিককে দেখিয়া)

ও আমি মনে করেছিলুম পাড়ার কোন হোকরা বুঝি। আপনার কী দরকার?

পথিক। আজ্ঞে, জল তেষ্টায় বড় কষ্ট পাচ্ছি— তা একটু জলের খবর কেউ বলতে পারলে না।

মামা। (তাড়াতাড়ি ঘরের দরজা খুলিয়া) কেউ বলতে পারলে না? আসুন আসুন!

কী খবর চান, কী জানতে চান, বলুন দেখি? সব আমায় জিজ্ঞেস করুন, আমি বলে দিচ্ছি। (ঘরের মধ্যে টানিয়া লওন—ভিতরে নানারকম যন্ত্র, নকশা, রাশি রাশি বই)

কী বলছিলেন? জলের কথা জিজ্ঞেস করছিলেন না?

পথিক। আজ্ঞে হ্যাঁ, সেই সকাল থেকে হাঁটতে হাঁটতে আসছি—

মামা। আ হা হা! কি উৎসাহ! শুনোও সুখ হয়। এ রকম জানবার আকাঙ্ক্ষা কজনের আছে, বলুন ত? বসুন! বসুন! (কতগুলি ছবি, বই আর এক টুকরা খড়ি বাহির করিয়া) জলের কথা জানতে গেলে প্রথমে জানা দরকার, জল কাকে বলে, জলের কী গুণ।

পথিক। আজ্ঞে একটু খাবার জল যদি—

মামা। আসছে—ব্যস্ত হবেন না। একে একে সব কথা আসবে। জল হচ্ছে দুই ভাগ হাইড্রোজেন আর এক ভাগ

অক্সিজেন- [ বোর্ডে খড়ি দিয়া লিখলেন]

পথিক। এই মাটি করেছে!

মামা। বুঝলেন? রাসায়নিক প্রক্রিয়ায় জলকে বিশ্লেষণ করলে হয়- হাইড্রোজেন আর অক্সিজেন আর হাইড্রোজেন আর অক্সিজেনের রাসায়নিক সংযোগ হয়ে হল জল! শুনছেন ত?

পথিক। আঙে হ্যাঁ, সব শুনছি। কিন্তু একটু খাবার জল যদি দেন, তাহলে তা মন দিয়ে শুনতে পারি।

মামা। বেশ ত! খাবার জলের কথাই নেওয়া যাক না। খাবার জল কাকে বলে?

যে জল পরিষ্কার, স্বাস্থ্যকর, যাতে দুর্গন্ধ নাই, রোগের বীজ নাই, ..... এই দেখুন এক শিশি জল- আহা, ব্যস্ত হবেন না। দেখতে মনে হয় যেন পরিষ্কার, কিন্তু অণুবীক্ষণ দিয়ে যদি দেখেন, দেখবেন পোকা সব কিলবিল করছে। কেঁচোর মতো কৃমির মতো, সব পোকা-এমনি চোখে দেখা যায় না, কিন্তু অণুবীক্ষণ দিয়ে দেখায় ঠিক এতো বড় বড়। এই বোতলের মধ্যে দেখুন, ও জল পুকুরের জল; আমি এইমাত্র পরীক্ষা করে দেখলুম, ওর মধ্যে রোগের বীজ গিজ্গিজ্জ করছে-প্লেগ, টাইফয়েড, ওলাউঠা, ঘেয়োজ্বর-ও জল খেয়েছেন কি মরেছেন! এই ছবি দেখুন-এইগুলো হচ্ছে কলেরার বীজ, এই নিউমোনিয়া, ম্যালেরিয়া-সব আছে। আর এই সব হচ্ছে জলের পোকা। জলের মধ্যে শ্যাওলা ময়লা যা কিছু থাকে, ওরা সেইগুলো খায়। আর জলটার কী দুর্গন্ধ দেখুন! পচা পুকুরের জল-ছেঁকে নিয়েছি, তবু গন্ধ।

পথিক। উ'হু' হু' হু'! করেন কী মশাই? ওসব জানবার কিছু দরকার নেই।

মামা। খুব দরকার আছে। এ সব জানতে হয়-অত্যন্ত দরকারি কথা!

পথিক। হোক দরকারি-আমি জানতে চাইনে, এখন আমার সময় নেই।

মামা। এই ত জানবার সময়। আর দুদিন বাদে যখন বুড়ো হয়ে মরতে বসবেন তখন জেনে লাভ কী? জলে কী কী দোষ থাকে, কী করে সে সব ধরতে হয়, কী করে তা শোধন হয়। এসব কি জানবার মতো কথা নয়? এই যে সব নদীর জল সমুদ্রে যাচ্ছে, সমুদ্রের জল সব বাষ্প হয়ে উঠছে, মেঘ হচ্ছে, বৃষ্টি পড়ছে-এসব কেন হয়, কিসে হয়, তাও ত জানা দরকার?

পথিক। দেখুন মশাই! কী করে কথাটা আপনাদের মাথায় ঢোকাব তা ত ভেবে পাইনে। বলি, বারবার করে বলছি- তেষ্টায় গলা শুকিয়ে কাঠ হয়ে গেল, সেটা ত কেউ কানে নিচ্ছেন না দেখি। একটা লোক তেষ্টায় জল-জল করছে তবু জল খেতে পায় না, এরকম কোথাও শুনছেন?

মামা। শুনছি বৈকি-চোখে দেখেছি। বদ্যিনাথকে কুকুরে কামড়ালে, বদ্যিনাথের হল হাইড্রোফোবিয়া- যাকে বলে জলাতঙ্ক। আর জল খেতে পারে না- যেই জল খেতে যায় অমনি গলায় খিঁচ ধরে যায়। মহা মুশকিল!-শেষটায় ওঝা ডেকে, ধুতুরো দিয়ে ওষুধ মেখে খাওয়াল, মন্তর চালিয়ে বিষ ঝাড়াল- তারপর সে জল খেয়ে বাঁচল। ওরকম হয়।

পথিক। নাঃ-এদের সঙ্গে আর পেরে ওঠা গেল না-কেনই বা মরতে এয়েছিলাম এখানে? বলি, মশাই, আপনার এখানে নোংরা জল আর দুর্গন্ধ জল ছাড়া ভালো খাঁটি জল কিছু নেই?

মামা। আছে বৈকি! এই দেখুন না বোতলভরা টাটকা খাটি 'ডিস্টিল ওয়াটার'- যাকে বলে 'পরিশ্রুত জল'।

পথিক । (ব্যস্ত হইয়া) এ জল কি খায়?

মামা । না, ও জল খায় না-ওতে ত স্বাদ নেই-একেবারে বোবা জল কিনা, এইমাত্র তৈরি করে আনল- এখনো গরম রয়েছে ।

[পথিকের হতাশ ভাব]

তারপর যা বলছিলাম শুনুন-এই যে দেখছেন গন্ধওয়ালা নোংরা জল-এর মধ্যে দেখুন এই গোলাপি জল ঢেলে দিলুম-বাস, গোলাপি রঙ উড়ে সাদা হয়ে গেল । দেখলেন ত?

পথিক । না, মশাই, কিছু দেখিনি-কিছু বুঝতে পারিনি-কিছু মানি না-কিছু বিশ্বাস করি না-

মামা । কী বললেন! আমার কথা বিশ্লেষ করেন না?

পথিক । না, করি না । আমি যা চাই, তা যতক্ষণ দেখাতে না পারবেন, ততক্ষণ কিছু শুনব না, কিছু বিশ্বাস করব না ।

মামা । বটে! কোনটা দেখতে চান একবার বলুন দেখি-আমি চোখে আঙুল দিয়ে দেখিয়ে দিচ্ছি-

পথিক । তাহলে দেখান দেখি । সাদা, খাঁটি, চমৎকার, ঠান্ডা, এক গেলাশ খাবার জল নিয়ে দেখান দেখি । যাতে গন্ধপোকা নেই, কলেরার পোকা নেই, ময়লাটয়লা কিছু নেই, তা দিয়ে পরীক্ষা করে দেখান দেখি । খুব বড় এক গেলাশ ভর্তি জল নিয়ে আসুন ত ।

মামা । এক্ষুণি দেখিয়ে দিচ্ছি-ওরে ট্যাঁপা, দৌড়ে আমার কুঁজো থেকে এক গেলাশ জল নিয়ে আয় ত ।

[পাশের ঘরে দুপদাপ শব্দে খোকার দৌড়]

নিয়ে আসুক, তারপর দেখিয়ে দিচ্ছি । ঐ জলে কী রকম হয়, আর এই নোংরা জলে কী রকম তফাৎ হয়, সব আমি এক্সপেরিমেন্ট করে দেখিয়ে দিচ্ছি ।

[জল লইয়া ট্যাঁপার প্রবেশ]

রাখ, এইখানে রাখ ।

[জল রাখিবামাত্র পথিকের আক্রমণ-মামার হাত হইতে জল কাড়িয়া এক নিশ্বাসে চুমুক দিয়া শেষ]

পথিক । আঃ! বাঁচা গেল!

মামা । (চটিয়া) এটা কী রকম হল মশাই?

পথিক । পরীক্ষা হল- এক্সপেরিমেন্ট! এবার আপনি নোংরা জলটা একবার খেয়ে দেখান ত, কী রকম হয়?

মামা । (ভীষণ রাগিয়া) কী বললেন!

পথিক । আচ্ছা থাক, এখন নাই-বা খেলেন-পরে খাবেন । আর এই গাঁয়ের মধ্যে আপনাদের মতো আনকোরা পাগল আর যতগুলো আছে, সব কটাকে খানিকটে করে খাইয়ে দেবেন । তারপর খাটিয়ায় তুলবার দরকার হলে আমায় খবর দেবেন- আমি খুশি হয়ে ছুটে আসব-হতভাগ্য জোচ্চোর কোথাকার! [দ্রুত প্রস্থান]

[পাশের গলিতে সুর করিয়া কে হাঁকিতে লাগিল-অবাক জলপান]

### লেখক-পরিচিতি

সুকুমার রায় ১৮৮৯ সালে ভারতের কলকাতায় জন্মগ্রহণ করেন। তাঁর পিতার নাম উপেন্দ্র কিশোর রায়। ‘আবোল তাবোল’, ‘খাই খাই’, ‘অবাক জলপান’, ‘হ-য-ব-র-ল’, ‘পাগলা কাকু’ তাঁর সাড়া জাগানো গ্রন্থ। ১৯২৩ সালে তিনি মৃত্যুবরণ করেন।

### সারসংক্ষেপ

এক পথিকের পথ চলতে চলতে পিপাসা পেল। সে জলের জন্য বিভিন্ন লোকের কাছে গেল। কিন্তু কারো কাছে জল পেল না। প্রথম যার কাছে জল চাইল, তিনি জলপাই মনে করলে পথিকের সাথে এ নিয়ে মৃদু তর্কাতর্কি হয়। পরে এক বৃন্দ্রের কাছে জল চাইলে তিনি তাকে বিভিন্ন প্রকার জলের ফর্দ শুনিয়ে দিলেন। তারপর এক ছোকরার কাছে জল চাইলে সে জলের সঙ্গে মিলিয়ে কবিতার ছন্দ বলতে শুরু করল। শেষে এক খোকর মামার কাছে জল চাইলে তিনি জলের বৈজ্ঞানিক বিশ্লেষণ শুরু করেন এবং জলের মধ্যে কত কিছুর বীজ আছে যা খালি চোখে দেখা যায় না বলে বক্তব্য দিতে শুরু করেন। পথিক বুদ্ধি করে শেষে বলল এক গ্লাস সাদা খাঁটি চমৎকার ঠান্ডা খাবার জল এনে পরীক্ষা করে দেখাতে। ঠান্ডা জল আসতেই পথিক এক নিশ্বাসে চুমুক দিয়ে গ্লাসের পানি শেষ করে কিছু মন্তব্য করে দূত প্রস্থান করে।

### শব্দার্থ

পথিক-পথচারী। তেষ্ঠা-পিপাসা। মগজ-মস্তিষ্ক। গেরস্থ-সংসারী মানুষ। জলপাই-সুপরিচিত অল্পস্বাদ ফলবিশেষ। মাছরাঙা-এক জাতীয় সুন্দর পাখি। কুয়ো-ইঁদারা, কূপ। নিন্দে-বদনাম, কুৎসা। অপদার্থ-অযোগ্য। অণুবীক্ষণ-চক্ষুর অগোচর ক্ষুদ্র পদার্থ দর্শনের যন্ত্রবিশেষ। মন্তর-মন্ত্র। জল-পানি। অবাক-আশ্চর্য।

## অনুশীলনী

### বহুনির্বাচনি প্রশ্ন

- পথিক তৃতীয়বার কার কাছে জল পান করতে চাইল?
 

ক. মামার কাছে	খ. ছোকরার কাছে
গ. বৃন্দ্রের কাছে	ঘ. ঝুড়িওয়ালার কাছে
- ঝুড়িওয়ালার কাছে পথিকের কী অন্যায় হয়েছে?
 

ক. ঝুড়ি নিয়ে যাচ্ছে, জল চাইবে কেন তাই	খ. যাত্রাপথে জল চাইল তাই
গ. ঝুড়ির মধ্যে জল নেই বলে	ঘ. বিশুদ্ধ জল নেই বলে
- মাছরাঙা কী?
  - লাল ধরনের মাছ
  - এক জাতীয় সুন্দর পাখি
  - মাছ খায় এমন পাখি

নিচের কোনটি সঠিক ?

ক. ii ও iii

খ. iii

গ. i

ঘ. i ও ii

### সৃজনশীল প্রশ্ন

নিচের অনুচ্ছেদটি পড় এবং প্রশ্নগুলোর উত্তর দাও :

যে জল পরিষ্কার, স্বাস্থ্যকর, যাতে দুর্গন্ধ নাই, রোগের বীজ নাই . . . . . এই দেখুন এক শিশি জল-আহা, ব্যস্ত হবেন না। দেখতে মনে হয় যেন পরিষ্কার, কিন্তু অণুবীক্ষণ দিয়ে যদি দেখেন, দেখবেন পোকা সব কিলবিল করছে। কেঁচোর মতো, কৃমির মতো, সব পোকা এমনি চোখে দেখা যায় না। কিন্তু অণুবীক্ষণ দিয়ে দেখায় ঠিক এতো বড় বড়। এই বোতলের মধ্যে দেখুন, ও জল পুকুরের জল; এইমাত্র পরীক্ষা করে দেখলুম, ওর মধ্যে রোগের বীজ গিজ্ গিজ্ করছে।

ক. পথিক প্রথমে কার কাছে জল খেতে চাইল ?

খ. ‘এদেখি আরেক পাগল! মশাই, আমি সে রকম মিলবার কথা বলিনি।’ পথিক এটি কেন বলল, লেখ।

গ. তৃষ্ণার্ত পথিকের প্রতি কীরূপ আচরণ করা দরকার বলে তুমি মনে কর- যুক্তিসহ উপস্থাপন কর।

ঘ. উদ্দীপকের আলোকে ‘অবাক জলপান’ গল্পের প্রকৃতি বিশ্লেষণ কর।



# রসুলের দেশে

ইবরাহীম খাঁ



এই সেই জেদ্দা যার কথা শৈশব হতে শুনে আসছি। নামের পরশে চিন্ততলে জেগে উঠেছে কত দূরদূরান্তের স্বপন। কত রোমাঞ্চকর কল্পকাহিনী। কত ব্যথা-বিদগ্ধ স্মৃতি। দেশ-দেশান্তরের কত হজযাত্রী এই জেদ্দায় জাহাজ হতে নামে, এসেছি রসুলুল্লাহ, তোমার দেশে এসেছি, এসেছি, আল্লাহ, তোমার প্রথম এবাদত-গাহের মূলুকে এসেছি বলে, কত আকুল প্রাণ কেঁদে ওঠে। উত্তেজনার আতিশয্যে কত বয়োদুর্বল যাত্রী এখানেই ঢলে পড়ে, তাঁদের মক্কা-মদিনা জিয়ারত আর হয়ে ওঠে না; তারা প্রতীক্ষমাণ আপন জনের এ-দুনিয়ার ঘরেও আর ফিরে যায় না।

সমগ্র আরবের ছবি মনের চোখে ভেসে উঠল।

সেমিটিক জাতিসমূহের লালন-ভূমি এই আরব। এই আরবদেরই এক শাখা ব্যাবিলনে গিয়ে উপনিবেশ স্থাপন করে। ফিলিস্তিন, আবিসিনিয়া এদের দিয়েই আবাদ হয়। বিভিন্ন রকম শিলালিপি হতে এখন প্রমাণিত হয়েছে যে, হযরত ঈসার কম-সে-কম হাজার বছর আগে আরবে এক বিরাট সভ্যতা বর্তমান ছিল। তারপর আসে পতনের যুগ।

খ্রিস্টীয় ৬ষ্ঠ শতাব্দীতে আরবের বুকে বিরাজ করতে থাকে অজ্ঞতার ভয়াবহ অশ্বকার, ব্লাহীন অনাচার আর জুলুম। মুক্তির বাণী নিয়ে আসেন মরুসূর্য মুহাম্মদ (স.); নতুন আলোকের পরশে আরবের বালুকারাশি পর্যন্ত জ্বলে ভাস্বর হয়ে ওঠে। দিকে দিকে গড়ে ওঠে নতুন নতুন জাতি, নতুন নতুন রাজ্য, নতুন নতুন সভ্যতা। তারপর মুসলমানের জাতীয় জীবনে শুরু হয় অবনতির ভাটা, ইসলামের সত্য সনাতন আদর্শ ভুলে তারা চলে ভুল পথে, ডেকে আনে নিজেদের মৃত্যু। আজরাইল শিয়রে এসে বসে জান কবজ করতে তৈরি হয়।

এমন সময় আবির্ভাব ঘটে মুহাম্মদ ইবনে আবদুল ওহূহাবের। মধ্য আরবের অন্তর্গত আযাইনাতে জন্ম। বসরা, দামেস্ক ও মক্কায় অধ্যয়ন শেষ করে এই সংস্কারক ১৮৫০ সালে জন্মভূমিতে ফিরে আসেন ও ঘোষণা করেন মুসলমানেরা ইসলামের পথ হতে অনেক অনেক দূর সরে গিয়েছে— তাদের আজকের এই দুর্বলতা, এই বেইজ্জতি এরই জন্ম। অতএব মুসলমানকে আগের পথে ফিরে যেতে হবে, ধর্মে ফিরে যাওয়ার মধ্যেই তার পূর্নজীবন লাভের একমাত্র পথ। যা ইসলামের বিরোধী— তার সাথে কোনো আপোষ নেই, কারণ সে আপোষের পরিণাম জাতির অধঃপতন।

আযাইনার আমির আব্দুল ওহূহাবকে আপদ মনে করে রাজ্য থেকে তাড়িয়ে দিলেন। তিনি আশ্রয় পেলেন দারিয়া-র আমির উদারহুদয় ইবনে সউদের কাছে। মুহাম্মদ ইবনে আব্দুল ওহূহাবের আহবানে দলে দলে বেদুঈন এসে তাঁর এই সংস্কারপন্থী ধর্মমত গ্রহণ করতে লাগল এবং নতুন নতুন সংস্কারের জন্য পাগল হয়ে উঠল। আর এদিকে মুহাম্মদ ইবনে সউদ তাঁদের সমর-শিক্ষায় নিপুণ করে তুলতে লাগলেন। এই নবগঠিত সৈন্যদলের সাহায্যে মুহাম্মদ ইবনে সউদ কিছুদিনের মধ্যে সমগ্র মধ্য ও পূর্ব আরবে তাঁর শক্তি সুপ্রতিষ্ঠিত করে ফেলেন।

এমনিভাবে আরবে সউদি শক্তি শিকড় গেড়ে বসল।

মুহাম্মদ ইবনে সউদের মৃত্যুর পর তাঁর পুত্র আব্দুল আজিজ পিতার রাজ্যের সীমাকে আরো প্রসারিত করেন। আরব তখন তুর্ক সাম্রাজ্যের অন্তর্গত। এবার তুর্ক প্রভুদের টনক নড়ল। তাঁরা তাঁকে দমন করতে লোক-লস্কর পাঠিয়ে দিলেন, কিন্তু তুর্ক সৈন্যরা কিছু করতে পারল না; ফিরে গেল। শোনা যায়, আবদুল আজিজ তুর্ক আক্রমণের জওয়াবে কারবালা ও মক্কা দখল করে সেখানকার মাজারগুলোকে একে একে ধূলিসাৎ করে ফেলেন ও বহু পবিত্র স্মৃতিচিহ্ন লুট করে নিজের রাজধানীতে নিয়ে যান। আব্দুল আজিজের এই ব্যবহারে ব্যথিত হয়ে একজন শিয়া একদা দারিয়ার মসজিদে হঠাৎ আক্রমণ করে আবদুল আজিজকে হত্যা করেন।

এমনিভাবে কখনও জোয়ার কখনও ভাটার ভিতর দিয়ে সউদি শক্তি কালের তীর বেয়ে চলতে থাকে।

বিংশ শতাব্দীর প্রথম ভাগ। তখন শাহজাদা আবদুল আজিজ পিতা আব্দুর রহমানের সাথে কুয়েতে নির্বাসিত, ক্ষমতা তখন মুহাম্মদ ইবনে রশিদ নামক এক বিচক্ষণ আমিরের কুক্ষিগত। মাত্র কয়েকজন অনুচরসহ একদা শাহজাদা আব্দুল আজিজ পিতার তাঁবু হতে বের হয়ে ধূসর মরুর দূস্তর পথে বিলীন হয়ে গেলেন। তারপর এদিক-সেদিক ওঁত পেতে থেকে এক রাতের অশ্বকারে রাজধানী রিয়াদের উপর ঝাঁপিয়ে পড়লেন, শাসনকর্তাকে পরাজিত করে হত্যা করলেন, তারপর নিজেকে রিয়াদের আমির বলে ঘোষণা করে চারদিকে তাঁর শক্তিবৃদ্ধির কাজে মনে-প্রাণে লেগে গেলেন। ইনিই সউদি আরবের অধিপতি মহামান্য রাজা আবদুল আজিজ ইবনে সউদ।

আজ এ আমির, কাল ও আমিরের সঙ্গে মিলে আবদুল আজিজ আপনার শক্তি বাড়িয়ে তুলতে লাগলেন। ইতোমধ্যে প্রথম মহাযুদ্ধের দামামা বেজে উঠল। আবদুল আজিজ বৃটিশ পক্ষ গ্রহণ করে নিজের শক্তিবৃদ্ধির নতুন নতুন পথ খুঁজতে লাগলেন। এদিকে মক্কার শরীফ হোসেন ইবনে আলী তুর্কের বিরুদ্ধে বিদ্রোহ ঘোষণা করে নিজেকে আরব দেশগুলোর রাজা বলে ঘোষণা করে বসলেন। আবদুল আজিজ চাপা হুঙ্কারে কেবল বললেন—

বটে! আচ্ছা !! অবশেষে ১৯১৭ সালে আব্দুল আজিজ ও শরীফ হোসেনের মধ্যে রণভেরী বেজে উঠল। আব্দুল আজিজের প্রচণ্ড আক্রমণের সামনে শরীফের সৈন্য টিকতে পারল না।

১৯২৫ সালে আব্দুল আজিজ তায়েফ, মক্কা ও মদিনা দখল করে নিলেন। এমনভাবে তিনি নেজ্দের ও হেজাজের একচ্ছত্র অধিপতি হয়ে বসলেন।

হজ উপলক্ষে যে আয় হয় এতকাল পর্যন্ত তাই ছিল সউদি আরবের প্রধান সম্পদ। সে আয় আজো আছে; কিন্তু ইদানীং তেলই সউদি আরবের শ্রেষ্ঠ সম্পদ হয়ে দাঁড়িয়েছে। পারস্য উপসাগরের তীরে বাহরান নামক স্থানে এই তেলের খনি—এক মার্কিন কোম্পানি এই তেলের ব্যবসা করছে; সউদি আরব অচিরেই ধনী দেশের মধ্যে গণ্য হবে। মক্কা-মদিনার মধ্যস্থ একস্থানে একটি সোনার খনিও আবিষ্কৃত হয়েছে।

আমরা যেখানেই গিয়েছি, সেখানেই সুলতান আব্দুল আজিজের প্রভাবের পরিচয় প্রত্যক্ষ করেছি। শরীফীয় আমলে ডাকাতের জুলুমের অন্ত ছিল না। কাফেলা ছেড়ে কোনো যাত্রী একটু পেছনে পড়লে সে ফিরবে, না কোনো ডাকাতের পাথরের আঘাতে পথেই পড়ে থাকবে, তার নিশ্চয়তা ছিল না। কোনো সময় কাফেলাকে কাফেলাই আক্রান্ত হয়ে পড়ত। এখন সেসব কিছুই নেই। চুরিও সম্পূর্ণ বন্ধ হয়ে গেছে। জেদ্দা হতে মদিনা সে যুগে উটের পিঠে ১২ দিনে যেতে হত। এখন মোটর বাসে দুই দিনে যাওয়া যায়; হাওয়াই জাহাজে যেতে লাগে দেড় ঘণ্টা। পানির ব্যবস্থা আগের চেয়ে ভালো হয়েছে। আগের দিনে মাছির জ্বালায় ঠিক হয়ে বসার জো ছিল না; সেই ডরে আমরা মশারি নিয়েছিলাম। কিন্তু বাক্স হতে মশারি বের করতে হয়নি। মক্কা ও জেদ্দায় ভালো ভালো রাস্তা ও দালান-কোঠা তৈরি হচ্ছে— শুনলাম মার্কিনী পরিকল্পনা মোতাবেক। মক্কার বাজারে রেশম পশমের পোশাক-পরিচ্ছদও যে পরিমাণ দেখলাম, ঢাকার বাজারে তা নেই।

সউদি আরবের দিন দিন উন্নতি হোক। আমরা এই কামনা করি।

## লেখক-পরিচিতি

ইবরাহীম খাঁ ১৮৮৪ সালে টাংগাইল জেলার ভূয়াপুর থানার শাহবাজনগর গ্রামে জন্মগ্রহণ করেন। কলিকাতা বিশ্ববিদ্যালয় থেকে এম. এ. ও বি. এল. পাস করে প্রথমে ময়মনসিংহ শহরে আইন ব্যবসা শুরু করেন। পরে শিক্ষকতায় যোগদান করে দীর্ঘদিন করটিয়া সা'দত কলেজে অধ্যক্ষের দায়িত্ব পালন করেন। ছোটগল্প, নাটক, রম্য রচনা ও উপন্যাস লিখে তিনি খ্যাতি অর্জন করেন। ১৯৭৬ সালে তিনি মৃত্যু বরণ করেন।

## সারসংক্ষেপ

লেখক রসুলের দেশ ভ্রমণ করতে গিয়ে জেদ্দায় অবতরণ করেন। তাঁর চোখের সামনে ভেসে উঠল আরবের ছবি। সেমিটিক জাতিসমূহের লালনভূমি আরব দেশ। এ আরব দেশের একটি শাখা ব্যাবিলনে গিয়ে উপনিবেশ স্থাপন করে। খ্রিস্টীয় ৬ষ্ঠ শতাব্দীতে আরব ছিল অজ্ঞতার অন্ধকারে নিমজ্জিত। এ সময় আরবের মানুষকে অন্ধকার থেকে আলোর দিকে নিয়ে যেতে আসেন শেষ নবী হযরত মুহাম্মদ (স.)। দিকে দিকে গড়ে ওঠে নতুন সভ্যতা। এক পর্যায়ে আবার শুরু হয় মুসলমানদের অবনতি। এমন সময় আবির্ভাব হয় মুহাম্মদ ইবনে আব্দুল ওহাবের। ইসলামের জাগরণের কাজ শুরু হয়। তাঁকে আপদ মনে করে আযাইনার আমির রাজ্য থেকে তাড়িয়ে দিলেন। দারিয়া-র আমিরের আশ্রয় লাভ করে তিনি পুনরায় মুসলমানদের জন্য কাজ শুরু করেন। বিভিন্ন ঘাত-প্রতিঘাতের মধ্য দিয়ে আরবের অধিপতি আবদুল আজিজ একচ্ছত্র অধিপতি হয়ে বসেন।

## শব্দার্থ

**জেদ্দা** - সৌদি আরবের একটি শহর ও সামুদ্রিক বন্দর। **চিত্ততলে** - মনের মাঝে। **কঙ্ককাহিনী** - আজগুবি কাহিনী বা গল্প। **এবাদত** - প্রার্থনা, মোনাজাত। **শিলালিপি** - পাথরে খোদিত লেখা। **মরুসূর্য** - মরুভূমিতে যে সূর্য ওঠে। এখানে ইসলামের শেষ নবী হযরত মুহম্মদ (স.) কে সূর্যের সঙ্গে তুলনা করে মরুসূর্য বলা হয়েছে। **অন্ধকার** - আঁধার। **শতাব্দী** - শতবর্ষ কাল। **সংস্কারক** - যে সংস্কার করে, উৎকর্ষ সাধক। **সনাতন** - অনাদিকাল হতে প্রচলিত, যা পূর্বে ছিল। **আবির্ভাব** - উপস্থিত হওয়া। **বিচক্ষণ** - বুদ্ধিমান। **গণভেরী** - যুদ্ধের বাজনা। **কাফেলা** - যাত্রীদল। **অধিপতি** - রাজা, প্রভু। **মক্কা** - সৌদি আরবের একটি শহর। এখানে হযরত মুহম্মদ (স.) জন্মগ্রহণ করেন এবং এখানেই কাবা শরীফ অবস্থিত। **মদিনা** - আরবের একটি শহর। মুসলমানদের তীর্থস্থান। **আজরাইল** - একজন ফেরেশতা। তিনি মানুষের জ্ঞান কবজ করেন।

## অনুশীলনী

### বহুনির্বাচনি প্রশ্ন

- খ্রিস্টীয় কত শতাব্দীতে আরবে অন্ধকার বিরাজ করত ?  
ক. ৬ষ্ঠ  
খ. ৭ম  
গ. ৮ম  
ঘ. ৯ম
- জেদ্দা হতে মদিনা যেতে হাওয়াই জাহাজে কতক্ষণ সময় লাগে ?  
ক. দুই দিন  
খ. দুই ঘন্টা  
গ. দেড় ঘন্টা  
ঘ. ১২ দিন
- আব্দুল আজিজকে হত্যা করা হয়, কারণ তিনি-  
ক. বেদুঈনদের ধর্মমত গ্রহণ করেছিলেন  
খ. মক্কার মাজারগুলোকে ভেঙে ফেলেছিলেন  
গ. শিয়া সম্প্রদায়ের সঙ্গে যোগাযোগ রাখতেন  
ঘ. রিয়াদের শাসনকর্তার সঙ্গে সন্ধি করেছিলেন
- আঁধার শব্দের অর্থ কোনটি ?  
ক. পাত্র  
খ. মাছের খাদ্য  
গ. ধার করা  
ঘ. অন্ধকার
- মুহাম্মদ (স:) কে মরুসূর্য বলা হয়েছে, কারণ তিনি-  
ক. ইসলামের প্রবর্তক  
খ. নতুন সভ্যতার জনক  
গ. বেদুঈনদের শত্রু
- সৌদি আরবে সুলতান আব্দুল আজিজের অবদান কোনটি ?  
ক. সাধারণ নাগরিকদের কর মওকুফ করা  
খ. যাতায়াত ব্যবস্থার উন্নয়ন ঘটানো  
গ. নাগরিকদের জন্য মশারির ব্যবস্থা করা  
ঘ. রাস্তার পাশ পাথর দিয়ে সাজানো

### সৃজনশীল প্রশ্ন

#### নিচের অনুচ্ছেদটি পড় এবং প্রশ্নগুলোর উত্তর দাও :

“খ্রিস্টীয় ৬ষ্ঠ শতাব্দীতে আরবের বুকে বিরাজ করতে থাকে অজ্ঞতার ভয়াবহ অশ্বকার, ব্লাহীন অনাচার আর জুলুম। এমন সময় মুক্তির বাণী নিয়ে আসেন মরুসূর্য মুহাম্মদ (স.)।”

- ক. কোন সময় আরবের বুকে অশ্বকার বিরাজ করত ?
- খ. ভয়াবহ অশ্বকার বলতে এখানে কী বুঝানো হয়েছে?
- গ. মানব মুক্তির জন্য রসুল (স.) যে পথ অনুসরণ করেছিলেন তার বর্ণনা দাও।
- ঘ. রসুল (স.) কে লেখক কেন ‘মরুসূর্য’ উপাধিতে আখ্যায়িত করেছেন তা বিশ্লেষণ কর।


#### নিচের অংশটুকু পড় এবং প্রশ্নগুলোর উত্তর দাও :

মহানবীর মৃত্যুর পর আরব দেশ পুনরায় অশ্বকারে নিমজ্জিত হয়। ঠিক তখনই আবির্ভাব ঘটে একজন ধর্ম সংস্কারকের। তাঁর মতে, ইসলাম ধর্মের পুনর্জাগরণের জন্য আরবদের প্রকৃত অর্থে ধর্মে ফিরে আসতে হবে। ১৮৫০ সালে এটি বাস্তবায়নের জন্য তিনি তাঁর জন্মভূমিতে ফিরে আসেন। ”

- ক. কখন আরব পুনরায় অশ্বকারে আচ্ছন্ন হয় ?
- খ. ইসলাম ধর্মের পুনর্জাগরণ বলতে কী বোঝায়?
- গ. ধর্ম-সংস্কারকের মতে মহানবীর মৃত্যুর পর আরবদের করণীয় কী ছিল।
- ঘ. মানুষকে ধর্মে ফিরিয়ে আনতে মুহাম্মদ ইবনে আবদুল ওহাবের ভূমিকা বিশ্লেষণ কর।

# ওকিং মসজিদে ঈদের জামায়াত

মুহম্মদ আবদুল হাই



লন্ডন পৌছার দু'দিন পরেই আমরা বকরা ঈদের নামায পড়তে গেলাম লন্ডন থেকে মাইল তিরিশেক দূরে ওকিং মসজিদে। লন্ডনে মুসলমানদের আরও কয়েকটি মসজিদ আছে। কিন্তু ওকিং সবচেয়ে বিখ্যাত মসজিদ।

বন্ধু-বান্ধবদের সঙ্গে দেখা হবে। মসজিদ কমিটির সৌজন্যে অন্তত একটি বেলার জন্য সিঁধ খাবারের দেশে রসনা পরিতৃপ্তিকর মুসলমানি খানা খাওয়া যাবে। আরও দেখা যাবে দুনিয়ার নানা জাতির মুসলমানকে—এক টিলে এতগুলো পাখি মারা যাবে দেখে লন্ডন প্রবাসীরা তো বটেই, এমনকি ইংল্যান্ডের বিভিন্ন অঞ্চলের অবস্থানকারী মুসলমানরাও ঈদের দিনটিতে ওকিং-এ নামায পড়তে আসে।

মুসলমানদের ঈদের নামাযের ধর্মানুভূতি ও ধর্মানুষ্ঠান ছাড়াও একটা বড় দিক আছে। সেটা হল তার সামাজিক দিক। এর মাধুর্য ও সৌন্দর্য কম নয়। এক আল্লাহ ও রসুলকে কেন্দ্র করে এক ধর্মবিশ্বাসে বিশ্বাসী বিশ্বের এক-তৃতীয়াংশ মানুষকে কী করে একত্র করেছে; ছোট্ট এ ওকিং মসজিদের প্রাঙ্গণে তার অপূরণীয় রূপ দেখে সত্যিই মন চমৎকৃত হয়। ঈদের দিনে ওকিং-এ এসে নানা জাতের মুসলমানদের মিলনে জামায়াত ও মিল্লাতের এ দিকটা এত করে চোখে পড়ে যে, অমুসলিমও তাতে আকৃষ্ট না হয়ে পারে না।

এখানে এসে আর একটা নতুন জিনিস চোখে পড়ল। ইসলাম ধর্ম যে জগতের নানা দেশে ছড়িয়ে আছে তার চাক্ষুষ পরিচয় পেলাম। মিসর, আরব, সিরিয়া, ইরাক, পারস্য, মালয়, ইন্দোনেশিয়া, চীন এবং আফ্রিকার বহু মুসলমান এসেছে। আর ভারত, পাকিস্তান ও বাংলাদেশের আমরা তো অনেকেই ছিলাম। এক এক দেশের লোক দেখতে এক এক রকম। ভিন্ন ভিন্ন রকমের চেহারা ও শরীর অথচ ঈদের নামায পড়তে এসে সব দেশের মুসলমানই ধর্ম বাঁধনে ভাই ভাই হয়ে গেছে। নামায শেষে চেনা-অচেনা নানা দেশের মুসলমানের কোলাকুলি দেখে কী যে আনন্দ পাওয়া গেল, তা ভাষায় প্রকাশ করা কঠিন। এ কোলাকুলি একদিকে যেমন মুসলমানে মুসলমানে, অন্যদিকে তেমনি জাতিতে জাতিতে।

নামায হল আরবিতে। কিন্তু ইমাম সাহেব খোতবা পড়লেন সকলের বোধগম্য ভাষা ইংরেজিতে। যাদের কাছে খোতবা পড়া হয়, তাদের ইসলামের সারকথা বোঝানোই খোতবার অর্থ। ওখানে নানা দেশের নানা লোক এসেছিল। এরা মোটামুটি সকলেই ইংরেজি বোঝে। খোতবায় ইমাম সাহেব বুঝাচ্ছিলেন। সকলের শোনার ধরন দেখে মনে হল সকলেই তা বুঝছে। ইংল্যান্ডের মতো আমাদের দেশের এ বিষয়ে সচেতন হওয়ার প্রয়োজন আছে। আমাদের দেশে যদি মাতৃভাষায় খোতবাটা পড়া হত তাহলে অনেক মজ্জাল হত আমাদের সাধারণ মুসলমানদের।

নানা দেশের অমুসলমানরাও ওকিং-এ এসেছে নানা বেশভূষায়। কেউ দেখতে, আর কেউ বন্ধুদের নেমন্তন্ন খেতে। ইংরেজরা সিঁদ্ব ছাড়া তো কিছু খেতে জানে না। এ সুযোগে তাই এখানকার প্রবাসী মুসলমানেরা তাদের বন্ধু-বান্ধবদের মুসলমানি খাবার খাইয়ে বন্ধুত্ব গাঢ় করে।

নামাযের পরে নামাযের তাঁবুতেই মসজিদ কমিটির তরফ থেকে কয়েকবারে হাজার দেড়েক লোক খাওয়ানো হল। সবাই তৃপ্তির সঙ্গে খেলাম পোলাও আর কালিয়া। ওকিং-এর এ খাওয়ার মধ্যে আর একটু বৈশিষ্ট্য আছে। মুসলমানদের হাতে হালাল করা টাটকা গোশত ঈদের নামায উপলক্ষে একটি দিনের জন্য এখানেই পাওয়া যায়। ইংল্যান্ডের গোশতের মোটা ভাগ আসে আর্জেন্টিনা থেকে। বিদেশ থেকে যে গোশত ইংল্যান্ডে আসে জবাই হবার পর থেকে মানুষের পেটে গিয়ে পৌঁছতে তার তিন চারটে মাস সময় লেগে যায়।

ঠান্ডা দেশ বলে গোশত নষ্ট হয় না। এর ওপরে আছে রেফ্রিজারেটর আর বরফ। দোকানে দিনের পর দিন এ গোশত ঝুলতে দেখা যায়। সুতরাং ঈদের দিন সাধারণ মুসলমান টাটকা গোশত খাবার আনন্দ মেটায়। আর ধর্মভীরুরা বহুদিন রোজা থাকার পর হালাল গোশত খাবার সুযোগ পেয়ে আল্লাহর কাছে এখানে শোকর গোজার করে।

পৃথিবীর জনসমুদ্রের সঙ্গে মিশবার ও বিচিত্র শোভা দেখবার সুযোগ পাই লন্ডনে। আজকের দিনে আরও শোভা দেখলাম মুসলমান জগতের। লন্ডন দুনিয়ার কসমোপলিটান শহরগুলোর অন্যতম। ইংরেজ রাজত্বের সমৃদ্ধির সঙ্গে লন্ডন শহর দুনিয়ার নানা দেশেরই স্নায়ু কেন্দ্র এবং তীর্থক্ষেত্র হয়ে রয়েছে। এখানে নানা দেশ থেকে নানা লোক আসে। নানা কিছু শিখতে ও দেখতে। তাই ইংল্যান্ড ভরে আছে নানান দেশের মুসলমানেও।

ইসলাম বিশেষ কোনো একটি জাতির ধর্ম নয়। নানা জাতি, নানা দেশ এ ধর্মের বাঁধনে কী অশুভভাবে বাঁধা পড়েছে— এখানকার ঈদের দিনে ওকিং তার অপূর্ব দৃষ্টান্ত তুলে ধরে। ওকিং মসজিদের সামনে বিরাট শামিয়ানা খাটানো হয়। তার চারধার দিয়ে এক একটা মুসলিম দেশের পতাকা টাঙানো হয়। পতাকাগুলোর দিকে একবার চোখ বুলালেই সে দেশের জাতীয় সংস্কৃতির পরিচয় পাওয়া যায়। ইন্দোনেশিয়া, বাংলাদেশ,

পাকিস্তান, আফগানিস্তান, সউদি আরব, ইয়েমেন, লেবানন, ইরাক, সিরিয়া, মিসর, জর্দান, তিউনিসিয়া, তুরস্ক, মরক্কো প্রভৃতি দেশের এক এক নিশান আকাশে উড়ছে। আর মাটিতে এক এক দেশের অপূর্ব পোশাক পরিচ্ছদ ভূষিত এক এক রকম চেহারার নর-নারী। তার মধ্যে আফ্রিকার নিগ্রো মুসলমানের পোশাক-পরিচ্ছদই অদ্ভুত ধরনের। ইন্দোনেশিয়ার মুসলমানেরা, চীন ও জাপানের পীত জাতের মধ্যে যেমন রঙের সুসমা রক্ষা করেছে, তেমনি মরক্কোর মুসলমানেরা ইউরোপের শ্বেত জাতির সবচেয়ে নিকটবর্তী বলে রঙের দিক থেকে ভারসাম্য রক্ষা করেছে। মাঝখানে আমরা বাঙালিরা না কালো না ফরসা। কিন্তু আফ্রিকার নিগ্রোরা জমকালো। ওকিং-এ দেখলাম নানান জাতির ক্লাস, পোশাক আর নানা জাতির নানা রং। এত বৈষম্য অপূর্ব সুন্দর বাঁধনে বাঁধা পড়েছে। সে বাঁধন হচ্ছে এক আল্লাহ এবং তাঁর রসুলে বিশ্বাস।

### লেখক-পরিচিতি

মুহম্মদ আবদুল হাই ১৯১৯ খ্রিস্টাব্দে পশ্চিমবঙ্গের মুর্শিদাবাদ জেলার মরিচা গ্রামে জন্মগ্রহণ করেন। আন্তর্জাতিকভাবে খ্যাত এ ধর্মবিজ্ঞানী ঢাকা বিশ্ববিদ্যালয়ের বাংলা বিভাগের শিক্ষক ছিলেন। দীর্ঘদিন উক্ত বিভাগের অধ্যাপক ও বিভাগীয় প্রধান ছিলেন। ১৯৬৯ সালের ৩রা জুন এক ট্রেন দুর্ঘটনায় তিনি মারা যান। লন্ডনে অধ্যয়নকালে সেখানকার জীবন ও প্রকৃতি সম্পর্কে অভিজ্ঞতার আলোকে লেখা তাঁর বিখ্যাত ভ্রমণকাহিনী ‘বিলেতে সাড়ে সাতশ দিন’। তাছাড়া তাঁর অন্যান্য উল্লেখযোগ্য গ্রন্থ হলো; ‘ধর্মবিজ্ঞান ও ধর্মতত্ত্ব’, ‘রাজনীতি ও তোষামোদের ভাষা’।

### সারসংক্ষেপ

মুহম্মদ আবদুল হাই ১৯৫২ সালে লন্ডন বিশ্ববিদ্যালয় থেকে তুলনামূলক ভাষাতত্ত্বে এম.এ. ডিগ্রি লাভ করেন। সে সময় তাঁকে সাড়ে সাতশ দিন বিলেতে কাটাতে হয়েছিল। প্রবাসজীবনের বিচিত্র অভিজ্ঞতার কথা তিনি লিপিবদ্ধ করেছেন তাঁর বিখ্যাত ‘বিলেতে সাড়ে সাতশ দিন’ গ্রন্থে। উক্ত গ্রন্থের সামান্য একটু অংশ হচ্ছে ‘ওকিং মসজিদে ঈদের জামায়াত’। লন্ডনের মতো কসমোপলিটান শহরেও কী সুন্দর ও আনন্দদায়ক ঈদের জামায়াত অনুষ্ঠিত হয়, তারই একটি সুন্দর বর্ণনা এখানে আছে। দেশে দেশে, জাতিতে জাতিতে বৈষম্য থাকা সত্ত্বেও অপূর্ব এক সুন্দর বাঁধনে বাঁধা পড়ে আছে বিশ্বের সকল মুসলমান; আর সেটা হচ্ছে ধর্মানুভূতির বাঁধন।

### শব্দার্থ ও টীকা

ধর্মানুভূতি - ধর্মের জন্য অনুভূতি। প্রাজ্ঞা - অজ্ঞান, উঠান। চমৎকৃত - বিস্মিত। সৌজন্য - ভদ্রতা। চাক্ষুষ - নিজের চোখে দেখা, প্রত্যক্ষ। হালাল - মুসলমান ধর্মমতে বৈধ বা পবিত্র। খোতবা (খোৎবা) - ইসলামের বিজয় ঘোষণা। কসমোপলিটান - বহুজাতিক, বহু জাতের সমাবেশ। দৃষ্টান্ত - উদাহরণ।



## অনুশীলনী

### বহুনির্বাচনি প্রশ্ন

ইংল্যান্ডে গোশত কম নষ্ট হওয়ার কারণ-

- i. ঠান্ডা বেশি বলে
- ii. প্রত্যেকের ঘরে রেফ্রিজারেটর আছে
- iii. সংরক্ষণ ব্যবস্থা উন্নত

নিচের কোনটি সঠিক ?

- |        |            |
|--------|------------|
| ক. i   | খ. ii      |
| গ. iii | ঘ. i ও iii |

### সৃজনশীল প্রশ্ন

১. সুমন ও সমিয়া লন্ডনে তার পিতামাতার সাথে বসবাস করে। ঈদের দিন নামায পড়তে গেল ওকিং মসজিদে। নানা দেশের নানান মানুষ চোখ ধাঁধানো সব পোশাক পরে ঈদের নামায পড়তে এসেছে এখানে। একই ধর্মে বিশ্বাসী মানুষের মিলন মেলায় পরিণত হয়েছে ওকিং মসজিদ প্রাঙ্গণ।

- ক. ওকিং মসজিদ কোথায় অবস্থিত ?
- খ. ঈদের দিনে ওকিং মসজিদের কোন দিকটা অমুসলিমদেরও আকর্ষণ করে।
- গ. তুমি এবার ঈদে যেখানে নামায পড়েছো সেখানকার বর্ণনা দাও।
- ঘ. ‘ঈদ মানুষের মিলন মেলা’ –বিশ্লেষণ কর।

২. ওকিং মসজিদে নামায হল আরবিতে কিন্তু ইমাম সাহেব খোতবা পড়লেন ইংরেজিতে। ওকিং এ যারা নামায পড়তে এসেছিলেন তারা মোটামুটি সকলেই ইংরেজি বোঝেন। তাই তাদের প্রত্যেকেই খোতবার অর্থ বুঝেছিল। সুমন যে মসজিদে ঈদের নামায পড়েছে সেখানে খোতবা আরবিতে হওয়ায় সুমন খোতবার কোন অর্থই বোঝেনি।

- ক. খোতবা কী ?
- খ. সুমন খোতবার অর্থ বোঝেনি কেন ?
- গ. ওকিং মসজিদে ঈদের খোতবা ইংরেজিতে পড়ার কারণ কী ?
- ঘ. মাতৃভাষায় খোতবা পড়ার গুরুত্ব বিশ্লেষণ কর।



দেশকে ভালোবাসো, দেশের মঙ্গলের জন্য কাজ কর  
- মাননীয় প্রধানমন্ত্রী শেখ হাসিনা

মিতব্যয়ী কখনও দরিদ্র হয় না



২০১০ শিক্ষাবর্ষ থেকে সরকার কর্তৃক বিনামূল্যে বিতরণের জন্য